


MULUKU AISUWANYEIHAKA

MWANEENE NI MIKHALELO SAWE

 Kaahituthuwa vakhani omoona mpatthani aka, Joseph Boze, vale, vano miyo khurukunuwa khukhalana okathi w'ovara ntata nawe.

² Nrowe nikhunle vano Masu a Muluku, mwa aHeperi, kapiitulu 1. Kintthuna kisome, nipuro nimosa, eversiikulu 1, 2, ni 3, wira nikumihe mwaha w'ohiyu.

Khalayi, Muluku aahaalavuliha axitiith'ahu imaara sinci-ene n'inamuna sinci-ene ni moolumo a maprofeta,

Mahiku ala ookiserya oonilavuliha ni moolumo a Mwan'awe, yoowo omuhienry'awe itthu sothene, nave-tho mwa yoowo opattuxanny'awe olumwenku;

Yoowo t'ori waarya w'ovuwa wawe, ni elatarato yoomalela ya makhalelo awe, ni t'onlipiha itthu sothene ni moolumo a owerya wawe, nuumala owo . . . ookilaathi moonoo woolopwana wa Oowerya sothene wirimu-rimu;

³ Nuurame miru sahu vano wira nivekele. Nto vano ohoolo wa Mukhalelo Awe w'Emuluku, mwakhalana yoovekela mwaatthun'anyu wira esuwelihiwe wa Yoowo, mwaanitthuna ovenxa ntata nanyu, ni eyo ti yoovekel'anyu, wira Muluku ono . . .

⁴ Tith'ihu a Wirimu, hiyo ninoorwa vano ohoolo w'ehice Anyu, mwaha wo waamini mwa Nsina na Yesu Kristu, Mwan'Inyu. Ni noolipiheriwa, wira, "Navekelaru etthu p'itthu mwa Nsina Nawe, ninoovahiwa." Ni Nyuwo munnisuwela sootthuna sahu ni soophavela sahu, ni Nyuwo moohimya wira mwaamuniphwanyiha sothene simphavel'ahu. Vano, Tithi, hiyo ninvekela ntoko Nyuwo siniixuttihaly'anyu, "Omwene Anyu orwe. Otthuna Wanyu wiireye siiso vathi, ntoko Wirimu." Wira yoovekela ahu, ohiy'ula, ekhale ntoko otthuna Wanyu w'ovaha, ni munivahe ireereliwo iya. Mureerihe Masu, Pwiya, ni othene anlavula ni aniiwa, ni wira Eroho Yowarya ekele ekhale namamaliherya Masu, ohiy'ula, eriyari ahu. Vano hiyo ninvekela mwa Nsina Nawe. Amen.

Mukilaathiki.

⁵ Meelo voosiisu, ntoko sinsuwel'aka, onookhala olya wa voosiisu w'Alipa a Nakoso a Ehapari yooreera Yoomalela. Voolimaleleya, vaavo awo vankhalan'aya mpantte mwaamukhaani, kookhalana oreeriwa w'olavula eriyari ya olya waya wa voosiisu. Mpakha va, owo ti mutthenkeso mmosa paahi,

vekeekhai ohikhanle mutthenkeso, masi, nikhuru nimoso paahi miyo—miyo kiniir’aka mpantta, ti Alipa a Nakoso aKristu. Nto vano miyo kinaalavulela yaawo, mulaponi mothene.

⁶ Vano, ohiy’ula, ninniroromela wira othukumana nno khunrowa okhala mahaleene. Miyo kirwiiye wa nyuwo, ookhulumuwa ene, vammilo voolala, ni wookiphwanya owereiwa masasu vakhani, wa . . .

⁷ Miyo kinkhuma oTucson weiwo okhanle wooreera ni woowuuma-wo, nto kinoorwa nno ni ti wooreera-wo ni woonaana, tivo wookhala ovirikana wuulupale. Nyuwo mwaakunxe maasi othene nno, khuveleeliherya epantte ahu, hiyo naamuxukhurela. Masi khamukhanle wira yeeyo, vekeekhai.

⁸ Masi kinooleelani etthu emosa, nookhala nlikanyiho vo. Itthu sahu—sahu—sahu sothene wArizona, miri sahu, ti soowaatta miiwa. Sothene sookhalana miiwa. Okhala wira ti woowuuma-wo. Vano vaakhanle wira etaparikhwa ele yinnunwe weno, naarowa okhala ntaakhuru nooreera ni noosivela. Moone, kherina maasi, mwaha wa yeeyo enkhal’aya mwiwa.

⁹ Nto ekereja yakhala ehirina Maasi a Ekumi, enkhalo yoowuuma ni ya miiwa, nave, enihoma ni enthorola sothene. Masi vaavo maasi a Ekumi ankhwalal’aya-vo, annitthukula ntaakhuru khukhalaha noowoolowa, noottokottha ni noosiva, noowaarya ni noomusivela Muluku. Tivo Apwiya Muluku enikhuwari, ohiy’ula, wira nihikhale miiwa; masi nikhale mataakhuru ooreera wira atthu oonyesererya ekilaathiki vathi va mwiri wa muuttutthi ahu n’uphwanya omumula wa minepa saya.

¹⁰ Vano kintthuna kikuxe mwaha, ohiy’ula, Apwiya yatthuna vale, ni kinaattamela miikoro iya sikhaani vanci-ene ntoko sinwery’aka, mwaha wookihalelaka nsu. Kintthuna, mwa osoma va wa aHeperi 1:1, kintthuna kikuxe mwaha wa: *Muluku Aisuwanyeiha Mwaneene Ni Mikhalelo Sawe*. Kinootthikela yeeyo, okhala wira koosuwela wira nsu khanireenre mu. Muluku onisuwanyeiha Mwaneene ni mikhalelo Sawe.

¹¹ Vano, khula etthu ensuweliwa mwaha wa mikhalelo saya. Ni kookhalana Solempwa kamosa-kamosa va kaatthun’aka . . . ni yoolepa, kaatthun’aka kihimye. Vano, mukhalelo w’etthu onnisuwanyeiha etthu ekhanly’aya.

¹² Vano, ntoko mwa ephattu yothene, ithutu sinsuwanyeya, imaara sinci-ene, ni mikhalelo saya. Sakhalaru soolattana, muthinto mmosa ni mukina, mukhalelo wa ethutu iyo onosuwanyeiha ethutu xeeni iyo. Ni makhalelo a mutakhwani, imaara sinci-ene . . .

¹³ Miyo—miyo ka namaxaya. Ni muhaana osuwela mukhalelo w’enama munxay’anyu, wala imaara sikina pooti wiisoottha vekeekhai. Mwa nlikanyiho, ntoko Epwittipwitthi ya

Mutakhwani oColumbia Pritanika wu. Miyo kaari ohitto wa Yukon ephovo ela evinre, axinna anli va vano jaarisa ni miyo, nto hiyo naamuxaya.

¹⁴ Vano nyuwo mwahaasuwela evirikanelo aya, mwaattharaka epwittipwitthi wala ethhove, khamwaarowa owerya ohimya evirikanelo aya 'vahikhanle wira mwa namaxaya oosuwela. Okhala wira, iyo sinihiya muthinto mmosaru wa mphito; sinootupha saatthyawaka. Vano nto nyuwo moona emosa yeemenleene ottaiwene, yiipithihaleene muru, vano, nyuwo—nyuwo waamoorikelani osuwela evirikanelo aya. Iyo sinihala olikana munnuwelo aya; epantte y'ottuli, ti yootteela ntoko ethhove. Yaamukhala yoorika ovirikaniha. Masi manyaka aya annisuwanyeiha mukhalelo aya, ni manyaka. Epwittipwitthi erina nnyaka nookhurupuwa, nto ethhove erina ithoka sinaataleleya. Nto etthu ekina, ethhove khiyaarowa osulu saana, wira yalye.

¹⁵ Vano nto epuri, yeettaka, nave, wookhala mukhalelo mw'epuri, ni mw'epwittipwitthi, vantthuneya wira mwaahaana osuwela evirikanelo mwa seiyo, mwakhala osulu iwe, okhala wira soopiili sinkhala vasulu vamwaako. Muhaana osuwela evirikanelo aya. Masi mwaweha vale, e—epuri enimwiikwattula yeettaka; enamwi, epwittipwitthi enlipiha inawu saya so, yeettaka. Mukhalelo wa enamuna enihiy'aya mphito aya. Nyuwo munsuwela muhavo anyu mwaha wa enamuna ya itthu oniir'aya, ni moota oniir'aya, ni etthu only'aya, ni sothene. Owo oniisuwanyeiha mwa mukhalelo aya. Vano nto nyuwo muupulule emosa vaipinth'aya, nwehe etthu eniiraneya, munoowerya ovirikanyiha enamuna sineett'aya. Munoowerya ovirikanyiha ni enamuna yeeyo inama soohiyana-hiyana.

¹⁶ Vano mootoko oweha, nksuwenle sinto nno aakhala wala nnari, iphera; ahe, kokootthi ti nsina naya noolikana, ni kiyare. Kiyare onihala olikana ni ephera munnuwelo awe. Vano mwawoona evavasaka, oowanli ankhala ntoko muxovo mmosaru w'axipalame. Mwaahiweryeke woona nikhuli, masi mwaawehe paahi, munoowerya ohimya t'evi ekhanle ephera. Kiyare onvava, ntoko, vovookololowa. Masi ephera, emmana mapupha aya; yaamanaka mapupha, eyo enrowa vathi n'usulu, vathi n'usulu. Moone, eyo enoowela n'ukhuruwa, *siso*, vano nyuwo munoowerya ohimya wira owo mukhalelo w'ephera, moota envav'aya.

¹⁷ Mwanweha vale o—opwiti akhuma vale avavaka, moota onwel'awe. Vano nto nwehe mwakhala muttaponi, memmo oopwiti akhanly'aya okhalaka, ni xu—ni xululu. Nyuwo munxaya munnisuwela eyo. Xululu a Wilson ni xululu eekaleeko, awo aniisuwanyeiha mwaha w'enamuna anveny'aya ni enamuna anvavas'aya. Awo aniisuwanyeiha mwaha wa enamuna anvavas'aya, muxovo xeeni w'axipalame akhanly'aya.

Tivo, owiwa paahi, munoowerya ohimya exeeni, enamuna owo onvav'awe, exeeni okhanly'awe, mwaha w'enamuna onvav'awe.

¹⁸ Ntoko mulopwana ni muthiyana. Oowanli aya atthu, masi muthiyana orina mikhalelo soovirikana ni mulopwana. Miyo kaamusoma va, okathi vakhani ovinre, sa Salomoni ni pwiyamwene. Nkinaphiyeryeke woolaleeryani Mutthak'aka mwaamukhaani va, nyuwo, wa pwiyamwene a Okuusini, arowaka omoona Salomoni, ni wona yoovaha ele yoolamula. Miyo kaasoma yeeyo, va woohikhala khalayi, nto ehimmwe, wira, "Emosa wa itthu sootikiniha aaruuheliwe Salomoni, yaari, pwiymwen'ola aamukunxe muthiyana, wala athiyana, kiireke, khwaawarihasa ntoko alopwana."

¹⁹ Vano, eyo yaari yootikiniha nihiku nlo, masi vekeekhai ti ya naanaano, olelo. Ni—ni nyuwo moosuwela wira eyo ti yoohiloka. Bibilia ohimye wira muthiyana khaakhanle wiraka siiso. "Ti yoonanara muthiyana owara ekuwo eri ya mulopwana." Ni Muluku yoole ohinrukunuwa oohimya yeeyo, tivo eyo ekeekhai.

²⁰ Vano hiyo ninnoona wira Salomoni, nuumala waawehasa, aahaarumasa weetta wala wira etthu, nto naanaanoru khwira, "Athiyana." Moone, owo aahiwerya omuhiyaniha mwaha wa mukhalelo wa muthiyen'ole, enamuna owo iiseettih'awe, wira aari muthiyana kahi mulopwana.

²¹ Vano nto etthu p'itthu eri siiso, ni mikhalelo saya. Siiso ntoko atthu anci-ene ary'aya oonyootho, ni a moonoo woolopwana. Iyo ti inamuna moota awo aniiseettih'er'aya. Munoowerya osuwela sinto mutthu a moonoo woolopwana wala onyootho, mwaha wa moota oniisettih'awe, enamuna amphavel'aya okuxa etthu kweekwe ni ntata noothiyana wala noolopwana.

Nto muupuwele, Yesu aahikhalana etthu siiso, wira . . .

²² Matata manli vekeekhai t'o . . . Anoolikana. Arina maravulo oolikana vakathani yuulupale, maravulo a vakathani, ikatha thanu; ekhaani, nthoonyo, ni sikina. Siiso ntoko ntata noolopwana ni ntata noothiyana arin'aya ikatha soolikana, voolimaleleya, munnuwelo mmosaru wa ntata, voolikaneene. Nto evirikanelo emosa-ene ekhanle, mwa yaawo, okhala wira nimosa ti noothiyana nto nikina ti noolopwana. Eyo t'evirikanelo emosa paahi mukhanly'anyu owehaka. Nimosa ti noothiyana, nikina ti noolopwana.

²³ Vano nto mwa yeeyo, Yesu oohimya . . . Kaamuwerya ohimya etthu yaamukhaani va. Yesu oohimya, mwa Matewu 24, wira, "Mikhalelo sa Eroho saarowa okhala ntoko soolattana mahiku ookiserya, soolattanexa saarow'aya owoototha ale oothanliwa vaakhanle wira vaaniweryaneyya." Moone, iyo saarowa paahi . . .

²⁴ Mukuxe ntata nanyu nvenxerye osulu. Moone, mwaahiwehe vale, nimosa ninlikana ni nikina, mwa inamuna sothene, masi nimosa ti noothiyana nikina ti noolopwana.

25 Ti siiso irooho siry'aya nihiku nookiserya. Iyo ti soohalela olattana, masi sookhalana mukhalelo onsuwanyeiha. Emosa ti yooreera, ekina ti yoonanara, ni vanniweryaneyya osuweliwa ni mukhalelo aya.

26 Eroho ya Muluku ennisuweliwa ni mukhalelo Aya. Munnona? Eroho ya Muluku, ni erooho ya ekereja. Yookhala erooho ya ekereja, ni Eroho ya Muluku ehikhanle ntoko erooho ya ekereja, hata vakhani.

Yookhala erooho ya muromolelo.

27 Yookhala erooho ya mulaponi. Yookhala erooho ya muttethe. Khula elapo, kaaphiyaka, vamphiy'anyu-wo, emphwanyaneyya erooho yoovirikana. Kaahirowa oFinlantiya, athu ooreera murima, masi yaahikhala erooho y'Efinlantiya. Karowa wAlemaanya, yookhala erooho ya wAlemaanya.

28 Va woohikhala khalayi, kaamurowa n'amwaar'aka, okathi waakhal'ahu oIndiana nlelo, iyaakha piili sivinre, epasari yuulupale. Kaammalaru orwa owaani. Naahaana orowa othuma yolya. Nto kirowaka weiwo, hiyo... Waari okathi w'elimwe, nyuwo pooti ohaamini, masi naahimuphwanya muthiyana mmosa aawanre evistiitu. Ni yaari yootikiniha, miyo... Eyo yaahikithananiha. Miyo—miyo khwira, "Nkawehani vale, ele ti yootikiniha, muthiyan'ole owanre evistiitu." Awo akina yaawaranse ikuwo sahaa... soohikhala s'athiyana. Nto—nto awo khwira... miyo khwira, "Ahe, ele vekeekhai erooho ya wAmerika, moone, erooho ya wAmerika."

29 Vano, erooho ya wAmerika, ti emosa... yaatthuneya okhala elapo y'Ekristu, masi erooho y'elapo ela kehiyo y'Ekristu. Pooti wiihaniwa elapo y'Ekristu, masi eri ikilomo imilyawu sene voorakamela yeeyo, mwa mukhalelo. Tivo, muthiyan'ola, miyo khwira...

Awo khwira, "Ahe, hiyo khanihiyo athu a wAmerika?"

30 Khwira, miyo khwira, "Nnari. Hiyo ninkhala wenna. Ela elapo ahu. Hiyo—hiyo—hiyo ninkhala muumu. Hiyo ennisivela. Ti elapo yooreerexa molumwenkuni. Masi, nnakhala vo, hiyo khanihiyo a wAmerika." Miyo khwira, "Hiyo niyariwe Osulu. Eroho Yowarya yookhuruwa, nto hiyo niniira mpantte w'Omwene. Kuhiyo w'olumwenku yoola." Miyo khwira, "Mwaha wa yeeyo axinn'ahu axithiyana anwar'aya ivistiitu, ankhalan'aya ikharari soorekama, ahiniipintary'aya. Moone, mikhalelo saya sinnaasuwanyeiha ntoko 'oowaarya w'Apwiya,' okhuma Osulu."

31 Tivo, hiyo ninrowela Omwene. Hiyo nimmurowela Mwene wira orwe owaakhele athu Awe ekelaka mOmwene ni mw'Awe. N'awo ansuwanyeihiwa ni mi—mikhalelo saya, wira mihakhu saya khasihiyo s'elapo yeela wala muttethe yoola. Ti s'osulu, Moovuwani. Tivo, awo, "Awo anwehererya Muttethe mmosa

Yoowo Namateka ni Namapaka okhanle Muluku.” Awo annisuwanyeihiwa oratteenexa.

³² Kaanithuna kikkhalanne nsu noophiyerya wira koolaleeryeni ohiyu umosa. Masi miyo—kookhuma mwa yeeyo. Vano, oosuwanyeihiwa ni mikhalelo saya.

³³ Hiyo ninniphwanya nthoonyeryo wooreera va okathi wa Isarayeli, okela mmuttettheni wa natiri. Ni Muluku aahiwiwana amuttharihaka natiri Awe. Owo aahimuleela Abrahamu wira, aarowa. . . osuulu awe waamurowa okhala elapo y’amalapo, iyaakha imiya xexe, vano nto Owo aamurowa owoopola ni ntata nuulupale na ikuru, n’awo yaamukela muttetthe mmosa, nto, yaahilaiheriwa, yaakhoowa eleethi n’uravo. Vano nto waattameny’aya okathi wa natiri, khurwa fa—Farawo mmosa ahaasuwela muteko muulupale wa Yosefe owo aarin’awe eriyari aya.

³⁴ Nto, ola, Muluku aahinvenxa profeta mmosa iihaniwa Moise. Nto mulopwan’owo aahixuttihiwa mwa osuwela w’othene wa atthu a wEjitu. Vekeekhai owo aari mutthu muulupale, oosuwela, oosoma, nave aaniwerya owiixuttiha miruku atthu a wEjitu. Aakhala ntoko mutthu oophwanelela—oophwanelela ovuluxa.

³⁵ Masi, moone, ele eniihan’ahu woopoliwa, ni ele Muluku eniihan’awe woopoliwa, soovirikana.

³⁶ Vano nkanweheni mulopwan’ola ni olakeya wawe wothene. Owo aahisuwela wira aayareliwe owoopola aana a Isarayeli. Nave, n’usoma wawe wothene, eyo ti wi ni sothene aasuwel’awe, ni asuwelaka wira iihaniwe ni Muluku wira avare muteko, owo aahikkhalana sothene sawe. . . Owo aahikkhalana Ekharawu awe ya Siyensiya a atthu, ni Ph.D., awe ni LL.D., ni sikina. Vano owo khurowa omoopola Isarayeli, nave aahivonya voomalela.

³⁷ Vano nwehe, yaakhala ntoko, mwaha w’okhala ni nnawo veehiceni ya w’Ejitu, wira akhale Farawo, aarow’awe owerya owoopola aana a Isarayeli nuumala okhala Farawo, okhala wira owo t’attharelana mphironi w’oranttela—ehice. Masi, moone, wira, wira siisaale, khaarowa osuwanyeiha inamuna sa Muluku owoopola atthu Awe.

³⁸ Owo aahimye wira aamurowa owoopola. *Owo* aamurowa “owoopola ni ntata na ikuru,” kahi Moise ni ntata n’enatoropa, masi Muluku ni ntata na ikuru.

³⁹ Ninniphwanya wira profet’ola aahitthyawa khukhala mothakoni iyaakha miloko mixexe. Saatthuneiye iyaakha miloko mixexe wira Farawo okelihe soosoma mwa yoowo, ni saatthuneiye iyaakha miloko mixexe wira Muluku akumihe-mo. Vano ninniphwanya, wira owo, nihiku nimosa wiithela wa mothakoni, aahikumana n’Apwiya Muluku vamwiiwani waavarela, ni mukhalelo wa Nlumi na Mooroo naari vamwiiwani. Vano owo khuvekeliswa wira orule ixapattho, wira, ethaya

aary'awe-vo waari woowaarya. Vano nkanweheni mutth'ula, ooreere murima, oolakeya, oosoma aary'awe, nkawehani orukunuwa wa mikhalelo sawe nuumala okumana ni Muluku. Owo aapanke yootepexa. . .

⁴⁰ Imaara sikina Muluku onniira itthu enamuna emosa yookhweya, ni enamuna emosa yoohitthokeleleya, wa enamuna yo wuupuwela w'erutthu. Nkanweheni mulopwana mmosa aari oovonya voomalela; n'anakhotto othene a wEjitu n'itthu sothene saari vakhiviru va yoowo wira aire otthuna wa Muluku, n'usoma wawe wothene, munnuwelo wa iyaakha miloko mixexe, osulu waya. Ola ori va, iyaakha miloko mithanu na miraru, voosiisu aya, n'amwaar'awe ekilanteene vasulu va mwaapuuru, ni mwanamwane mmosa muyuununi mwawe, n'ikopo mmatatani mw'awe, arowaka wEjitu, wira axintte. Eyoonelo xeeni yootheiha! Masi eyo yooniherya mikhalelo sa Muluku, okhala wira Owo aahikhalana mutthu aamini Masu Awe. Ti yeeyo tu. Etthu ene ti wira, mwaamuwerya otthokelela otuphela wa mutthu mmosa arowaka wEjitu, weiwo, natoropa aavonyaly'awe? Masi yaari exeeni iyo? Mukhalelo awe, iyiirelo sawe saahirukunxiwa. Owo aarowa mwa Nsina n'Apwiya, "MIYO T'ULE KINKHALA." Etthu ene yaari wira, owo aahixintta. Owo aahixintta, okhala wira aarowa ni Owerya w'Apwiya.

⁴¹ Mphironi, amuroihaka Isarayeli muttethe wa natiri, owo aahikumana ni munn'awe, munn'awe a mmuromoleloni, Mowabi. Vano, Mowabi, khayaari apakawu, hata vakhani. Awo yaari aana a mwaana mwaamuthiyana a Lothi. Mwa mwan'awe mmosa aamu—aamuyanre Mowabi.

⁴² Vano, osulu iwe, kintthuna wira nwehe maloko ala manli, mwa ohiiwanana. Nno aari Ejitu, mukhaani, oomwaramwareya, hata muttethe wira orowe-wo, hata nikhuru n'akhulupale wala mwene, wala hat'etthu, wala makhulupale eriyari aya, atthu paahi yeetta erowaka muttethe wa natiri. Ni nno awo yaahaana ovira mmuttettheni wa Mowabi. Waari muhina wa natiri.

⁴³ Nto Mowabi, nave, yaari oomwaamini Yehova, ni yaahikhalana profeta. Ni Isarayeli aahikhalana profeta. Oowanli aya yaahikhalana maprofeeta.

⁴⁴ Nto vano nwehe, awo yaahiphiya nipuro profeta a nloko nootthokihiwa aarw'awe wira atakhalihe nloko nla nikina, okhala wira naari nooweetasa paahi, nihikhalanaka nipuro n'ekeekhai n'okhala. Tivo awo khukhuruwela.

Ni mwaawehe maprofeeta ale anli: Vaaphiyeryaka olavula mwa soophaveleya, oowanli aya vekeekhai yaahikhalanasa exariya. Okhala wira, nwehe, Palaamu, pikipu, aahaahimeerya, "Vano, mukitekele altaari athanu n'anli."

⁴⁵ Thanu na piili ti nummaru noomalela na Muluku, ninthoonyerya Okathi Mithanu na miili wa Ekereja, mahiku

mathanu na manli a opattuxa, ni sikina. Vano nwehe, thanu na piili, Muluku ommalela mwa thanu na piili.

⁴⁶ “Altaari athanu n’anli, ni va khula altaari khumpwehavo mwa—mwaanyompe.” Vano owo ti altaari mmosaru yoowo awo yaarin’aya vapuwani va Isarayeli. Awo amphwanyaneya iwe wIsarayeli, ni altaari mmosaru yoowo awo arinas’aya osulu nno; ni mukuttho mmosaru, mwaanyompe ni mwaanyompe; profeta ni profeta. Maloko manli, moohiiwanana.

⁴⁷ Nthoonyeryo noolikana na nihiku hiyo ninkhal’ahu, naakhalanneru okathi w’okela mwa yeeyo. Nwehe, Muluku airaka yeeyo mwa nlikanyiho nla, wira nisuwele, apakaka voolikana.

⁴⁸ Vano, nave, Palaamu aahinvekela mwaapwittipwitthi vasulu va khula altaari. Eyo yaahimya omwaamini wawe Mesiya aarowa orwa. Mwaapwittipwitthi, epwittipwitthi y’olopwana, ti mukuttho yoowo awo yaarinas’aya wIsarayeli; ohitto vapuwani wa Isarayeli, osulu nno mwa . . . oMowabi. E . . . Voophaveleya, awo oowanli yaahikhalana exariya, masi, nwehe, voophaveleya mwa mwiixuttiho.

⁴⁹ Masi profeta mmosa vapuwani va Isarayeli aarina mikhalelo sa Muluku ni Masu a Muluku. Owo aahikhala ni natiri a Muluku a okathi ule, okhala wira aari mulinyani arowaka muttethe wa natiri. Munnona?

⁵⁰ Vano, naahimyaka epantte yoophaveleya, Palaamu, Palaki aaniwerya osuweliwa siiso ntoko Moise.

⁵¹ Masi, moone, Moise, ory’ene profeta ooloka a Muluku, kahi wira aarina epantte yoophaveleya paahi, masi aahikhalana osuwanyeya wa Muluku. Moone, owo aari muhina wa muteko, veekhai yeeyo yaalaiheriwe okathi ule; kahi a okathi wa Nowe, masi a okathi yoole. “Miyo kinimoorihani elapo enikhoowa eleethi n’uravo.” Awo yaari mphironi, nto Isarayeli aasuwanyehiwa ni profeta aya, Moise, ni Mutthaka w’okathi ule. Mikhalelo sa Muluku soosuwanyehiwa mwa Moise. Nlumi na Mooro naanimutthara. Owo nave aahikhalana ettipiheryo evaraka muteko; kahi olavula, masi okhalana evaraka muteko. Kahi etthu enrowa okhala; ele ekhanle naanaano va!

⁵² Nwehe, owo aahikhalana enowa y’eporonse yaathomeiwe mwaha wa ikwerere n’iretta s’atthu, tivo Moise aanipaka ovoniha wa Muluku. Owo aahikhalana ettipiheryo, enowa y’eporonse, yaathoonyerya wira Muluku aari vapuwani, ni atthu yaaweha enowa yeele y’eporonse ni yaanivonihiwa.

⁵³ Owo nave aahikhalana Mwala waamaniwe waamutthara yoowo. Nto eyo yaamusuwanyehiwa Muluku, wira ekhalihe Maasi a Ekumi eriyari aya, otthapa ni woopoliwa, wira awo khayaarowa opweteya masi ekhalane Ekumi ehinimala. Nlo naari nlikanyiho na . . . Mwal’ole woomaniwa mothakoni naari nlikanyiho na Kristu amaniwaka.

54 Vano, awo yeetta mukwaha muhina wa natiri. Iwo waari osuwanyeihiwa okina, wooniheryaka mukhaleleo wa Muluku. Voohicala moota xeeni ola mukina aary'awe mwa soophaveleya ni Masu; owo aahikhalana mulipiheryo, ni osuwanyeihiwa, ni mukhalelo wa Muluku eriyari aya. Muluku aahisuwanyeiha Mwaneene. Maprofeta anli, oowanli aya maprofeta, ni oowanli mwa yoophaveleya; masi Muluku aahisuwanyeiha mikhalelo Sawe mwa Moise, okhala wira aarina mikhalelo sa Muluku mwa yoowo.

55 Vano, emaara ekina, mikhalelo sa Muluku kweekwe ti suulupale, okhala wira Owo muulupalexa. Muluku muulupalexa. Ti yootikiniha, kweekwe, wa etthunelo ya naanaano yo wupuwela wa nihiku. Nyuwo moosuwela eyo. Muluku kweekwe onniruhela mukattyamiho, ma—makhuru a etiini wa khula okathi otonko ovira.

56 Ni khuuvo hata okathi mmosa mutthu wala nikhuru nitonko aya wiitthokiha vamosa vasulu va mutthaka awo khuhikhwa ni khuhikhuma mmutekoni, ni khanatthikeleke-tho ovenya. Khiivo hata ehantisi. aLuteraano, aPrespiteriyaano, aMetotista, aPatista, aPentekosite, n'akina, khanatthikeleke-tho ovenya, yakhaliharu makhuru ni Yeela.

Muluku onvara muteko ni mutthu.

57 Nwehe, Owo t'ohilimaleleya mwa enamuna yo wupuwela. Moone, ninoopacerya etthunelo, ni nihaana waamini Ela sa. Vano nto Muluku onoorwa ni Masu Awe Owo olaihenry'awe, ni wiisuwanyeiha Mwaneene mwa Masu yaawo. Nikhuru nla khaninwerya orowela Yaawo, okhala wira khaninaamini Yaawo. Moone, nihiivalaanya ni Yaawo.

58 Ntoko Yosefe, owo aari mwaana a Davidi, ni mutthu ooreera murima, Yosefe iy'awe Maria. Owo aari mutthu ooreera murima, ni vekeekhai aanimusoma Bibilia, isapala, voohihererya, okhala wira...ni aamuwehererya Mesiya aarowa orwa, ni aanisuwela etthu Yolempwa yaahimmy'aya wira yaamwiiraneya. Yesaya iirale, "Mwali harus i onoorupala."

59 Ahe, vano, owo eetta ni mwali yoola, Maria, alakela aarina iyaakha muloko ni thanu na tthaaru, n'uwo alakela aari muulupale vakhani. Vano nto okathi yaakamelan'aya wira ethelane, owo onkhala wira onrowa okhala maama. Vano eyo yaari yoomurikela Yosefe ovilela yeeyo. Vekeekhai Maria aahimuhimeerya oxekurya wa Kapiriyeli. Masi hiyo ninniweha wira, mwa enamuna mukhalelo awe waamweettihery'aya, owo aahihoverya.

60 Vano vaahoonaneya wira owo aarowa okhala maama ehinatthi othelanasana. Ni, mBibiliani, ehukhumu iyo enkhala okhwa, avonyiwaka maluku. Muthiyana oohitheliwa aarowa okhala maama, aahaana ovonyiwa ni maluku. Khiwaakhanle

onamuttompe wIsarayeli. Waahimalamalihiwa. Tivo hiyo ninnoona, mwa Otumererya, onnihimya yeeyo.

⁶¹ Vano hiyo ninniphwanya wira, Maria, yaakhala ntoko owo eererya omukhalihya Yosefe ntoko nikula noowiisaakiha—no etthu owo iiraly’awe. Okhala wira, aaphwanyiwera ahalaka okhala maama ehinatthi othelana, nto aahaana ovonyiwa ni maluku, nto aahaana okhalana mutthu vano aarowa okhala ntoko nikula noowiisaakiha—no. Ni yaakhala ntoko, sothene, ntoko wira ti yeeyo aatthun’awe wira.

⁶² Masi Yosefe awehaka maitho awe maalupale ooreera, ni owo aamwiira, “Yosefe, Kapiriyeli ookileela, ‘Eroho Yowarya enoorwa wookhuneelani muuttutthi, ni Etthu ila enrowa orupaliwa mwa nyuwo—mwa nyuwo ti ya Eroho Yowarya. Ti Muluku. Ti yeeyo enrow’aya wiihaniwaka, “Mwaana a Muluku.”” Ni, Yosefe, owo—owo—owo aanitthuna waamini yeeyo, masi yaari yoohilimaleliwa. Eyo khiyaatonko wiiranya khalayi.

⁶³ Nto ti siiso siry’aya olelo. Vaakhanle wira naaniwerya paahi... Vaakhanle wira kaahikhalana enamuna yo wiiraha atthu woona wira ohilimaleleya w’etthu p’itthu, yakhalaru yoosuwanyeihiwa ni Masu, vano mikhalalo saya sinnooniherya etthu xeeni iyo. Ti Muluku mmutekoni.

⁶⁴ Yosefe aahaana wira osuwenleene yeeyo. Owo aahaana wira osuwenleene wira, “Mwali harusi onoorupala.” Masi owo aari naxariya wa yeeyo. Owo khaatthuna omuhiya, ni mwiitihho, masi owo—owo aanuupuwelela wira.

⁶⁵ Vano nto Nlaikha n’Apwiya khimukhumelela moolohani. Mootoko wiikoha mwaha wa xeeni Nlo naarwiiy’aya moolohani? Khiyaakhanle maprofeta mahiku ale. Yooloha aya yaari yookhweyaxa, khiyatthuneya otaphuleliwa. Khwira, “Yosefe, mwaana a Davidi, muhoovelele omukuxa Maria mwaar’inyu, maana ole orupaliwe mwa yoowo ti a Eroho Yowarya.” Moone, nto, eyo yaahimaliha mwaha. Moone, Nlo naamurweenle moolohani, vanenli. Masi, moone, khaakhanle hata profeta vale wira asuwanyeihe Masu ale, wira, “Ola ti mwali harusi onrowa orupala.” Munnona? Vano, tivo, Nlo naamurweenle moolohani, okhala wira owo aari naxariya ni a nneema ni mutthu ooreera murima.

⁶⁶ Ni kookupali wira Muluku onoomurweela khula mutthu ooreera murima, mwa enamuna emosa, ni osuwanyeiha soowiira Sawe wa mutthu yoowo ooreera murima, wa okathi yoowo, vakhalaru wira mutth’uwo ohiihaniwa ni Muluku okathi yoowo.

⁶⁷ Vano, masi yaari yoohilimaleleya, awo vaanaarikela osuwela saana pahi. Masi, kweekwe, orwa attharihaka Masu oolaiheriwa a okathi, ohilimaleleya weno wothene.

Vano aakhala atthu kamosa-kamosa akhanle orowaka iwo, ni wira, “Ahe, *ela* ti yootikiniha, ti Muluku. *Ela* ti yootikiniha.”

68 Masi, moone, ehaana osuwanyeihiwa ni Masu, ni Masu Mulukuu. Munnona? Vano nto mukhalelo wa osuwanyeihiwa nno onnisuwanyeiha owo t'ani, 'okhala wira Muluku aahihimya wira, "Ela yaamukhumelela," vano ennikhumelela. Munnona? Mukhalelo aya ti Masu a Muluku answanyeihiwa ni mukhalelo w'etthu eniiraneya.

69 Owo aahihimya wira mahiku ookiserya aamurowa omwarexa Eroho Yowarya. Owo khwira yeeyo. Mikhalelo saya soosuwanyeiha wira aari Mulukuu, Masu Awe yaalaiheriwe. Moone, kweekwe anniisuwanyeiha nneene.

70 Vano, kweekwe, khula okathi, ennilakiherya nuulumo, Masu yahimmwaru voovonyeya. Mootoko oweha? Yaari mahiku a Nowe, aalakihenry'awe okathi ule wa siyensiya, wira Muluku aamurowa okuruxa maasi okhuma wirimu. Aari Moise, moone, aalakihenrye okathi awo othene yaaikhalihaly'aya wEjitu, ni siiso, masi Masu a Muluku yaahaana orwa wira esuwanyeihiwe. Ni Ekeekhai ya Masu ennilakiherya ele evonyeiye.

71 Mukihiye kookoheni etthu emosa. Ninoowerya orowa vathixa va. Nkikhanle olaleeryaka ekano wala mwixuttiho, masi mukihiye kookoheni etthu emosa.

72 Yesu aari Masu. Hiyo noosuwela eyo. Biblia ohimye wira aari yoowo. Yohani Oowaarya, kapiitulu 1, "Wopaceryani naari Nsu, nto Nsu naari ni Muluku, vano Nsu naari Muluku. Vano Nsu khwiipaka erutthu khukhala ni hiyo." Owo nlelo Masu. Vano okathi Owo waawery'awe osuwela soutuupuwela saya, awo yaahaana wira esuwenleene wira ale yaari Masu, okhala wira Masu a Muluku yaahimye wira ti yeeyo Owo aarow'awe wira. Owo aari ti Profeta.

73 Vano nwehe, ninnoona wira okathi Owo oyariw'awe, orineene iyaakha soophiyaka muloko ni piili, Owo aahirowa oniirani wa maxaaxa. Ni awo yaahirowa iwe oniirani na Pasikha. Nto, mphironi etthikaka, awo yaheetta mahiku mararu ni Owo aahaalakaseya; yoonaka wira, yuupuwelaka, ahiiso, yaakanyeryaka wira Owo aari eriyari y'atthu aya.

74 Naamuwerya okhalana nisomi na yeeyo. Ti yoolikanexa nnihiku n'olelo! Vano nyuwo mMetotista, Patista, Prespiteriyaano, Luteraano, muKatolika, etthu p'itthu mukhanly'anyu, moone, muniira etthu emosaru yeeyo. Nyuwo munaanyiherya wira okhala wira Wesley aahikhalana muhakalaliho muulupale, Lutero aahikhalana muhakalaliho muulupale, wala Pentekosite aahikhalana muhakalaliho muulupale, munaanyiherya wira Owo ori eriyari y'atthu, okathi, imaara sikina Owo khakhanle vo.

75 Awo yaahirowa khumphwanya Owo. Awo yaamuphwanyye yayi Yoowo? Weiwo yaamuhin'yaaya-wo, oYerusalemu. Nto okathi amuphwanny'aya, Owo iira exeeni? Mwammiravo, iyaakha muloko ni piili, alakela ahaatonko okela

muxikola woohikhala etthu ekina ohiya ele ame Awe yaamwiixuttihaly'aya; ni va Owo aari mpaani m'okokhorela, avaanyihanaka n'anamukuttho ale, mwaha wa Masu a Muluku. Vano awo yaanixankela ankhili a Mwaan'ola. Mwaha wa xeeni? Owo aari Masu. Vano nwehe.

⁷⁶ Nto vano kahi ohoottittimihani nyuwo aKatolika munimwiihana Maria mai a Muluku, masi mukihye paahi kiwooniheni evonyeryo ekhaani va. Vakhala wira ekereja etekiwe vasulu va Maria, nkawehani etthu yaakhumelenle. Vano owo aahirwa khwira, "Oh, Atith'inyu ni miyo naaniwaavyani, ni maithori." Nkawehani nuulumo nlo, nto owo aahikhotta onaamon'awe. Owo iirale, "Atith'inyu ni miyo naaniwaavyani, ni maithori."

⁷⁷ Nkawehani Masu awo. Owo aari Masu. Owo khwira, "Khamunsuwela wira kihaana ovara muteko w'Atithia Aka?" Nkawehani Masu elakiheryaka yoovonyeya. Vaavale vene ohoolo w'anamukuttho ale, owo aahihonona onamoon'awe. Aahimye wira aarupanle ya Eroho Yowarya, nto va ohimye wira Yosefe aari "tiithi" Awe. Munnoona Masu awo evaraka eyo naanaanoru? Owo aari Masu. Vano, moosuwela wira mmiravo a iyaakha muloko ni piili khaakhanle wira yeeyo. Owo aari Masu. Owo aari Masu oolavuliwa a okathi yoole, vano tivo mukhalelo woosuwanyeihiwa wa Muluku waari mwa Kristu. Owo aahilakiherya ivonyeryo. Owo khwira. . .

Awo khwira, "Vano, hiyo n'awiixutti a Moise." Munnona?

⁷⁸ Owo khwira, "Mwaari awiixutti a Moise mwaamukisuwela Miyo. Owo oolepa sa Miyo. Moise iirale, 'Apwiya Muluku anyu anoomuthanla Profeta ntoko miyo.' Mwaamukisuwela Miyo mwaamusuwenle Moise."

⁷⁹ Nto, moone, Masu kweekwe annilakiherya evonyeryo ya nihiku. Masi atthu khonaasivela waamini. Awo anoothipelela paahi, vamosaru paahi.

⁸⁰ Masi Yesu aahaalakiherya ame Awe ene. Nto ame Awe yaari moovonyani, 'okhala wira awo yaahihimya wira ole aari Mwaana aarupaliwe mw'awo mwaha w'Eroho Yowarya, nto va awo khunarukunxa onamoon'aya ni wira Yosefe aari "tiithi," aya aari tiithi a—a Yesu. Vano vakhala—vakhala wira Yosefe. . .

⁸¹ Vakhala wira Owo aari mwaana a Yosefe, vaakhanle wira Owo aari mmutekoni mw'atithi Awe, Owo aarowa okhala okalapintaria.

⁸² Masi Owo aari mmutekoni mw'Atithi Awe, Mpaani m'okokhorela mme, apwapwelaka mitthenkeso iye. Munnona? Owo aari mmutekoni mw'Atithi Awe, Mmiravo mmosa a iyaakha muloko ni piili paahi. "Khamunsuwela wira kihaana okhala mmutekoni, mw'Atithi Aka?"

⁸³ Mooweha okathi Yesu aatthattehiw'awe ni Satana? Mukhalelo Awe vale, okathi Owo aary'awe m'otthattehiwani mw'Awe, waahimusuwanyeiha Owo wira aari Muluku, okhala wira Owo aahikhala ni Masu. Munnona? "Yoolempwa," aahimye Satana.

Yesu khwira, "Yoolempwa-tho," aahikhala ni Masu.

⁸⁴ "Khalayi, Muluku," hiyo noosoma va. "Khalayi, Muluku," eyo ti wi okathi wa khalayi, "n'inamuna sinci-ene," n'inamuna sinci-ene, "aahiisuwanyeiha Mwaneene wa maprofeta Awe mwa soowoona." Owo waari mukhalelo wa profeta, waari okathi aahimye'awe itthu khalayi ene n'ukhumelela. Vano owo waari mukhalelo awe wo wiisuwanyeiha wawe, wira Muluku aari ni yoowo. Vano eyo yaanimuvaha ehaakhi y'otaphulela Masu a nihiku nenlo, okhala wira, "Masu a Muluku anrwa wa maprofeta," mukhalelo wa profeta, Owo aamuhimaly'awe khalayi ene.

⁸⁵ Bibilia oohimya "Akhala mmosa, nto enihimye'awe khukhumelela, vano mmwiiwelele; masi, yaahikhumelele, muhimwiiwelele, muhimoove, masi Awaka . . . vakhala—vakhala wira Masu Aka khakhanle mwa yoowo. Masi yakhumelela, vano Masu Aka ari mwa yoowo." Iwo t'usuwanyeihiwa wawe. Owo ti mukhalelo wa profeta.

⁸⁶ Vano, Muluku, khalayi, ti siiso Owo oonihery'awe mikhalelo Sawe so wiisuwanyeiha Wawe wa mutthu, alavulaka mwa mutthu oihaniwe wira akhale profeta. Vano, Bibilia onihimya wira, "Khalayi, Muluku, aahaalavuliha axitiith'ihu, n'inamuna sinci-ene ni moolumo a maprofeta."

⁸⁷ Noosoma-tho wira, mwa Petru Anenli, wira Masu a Muluku alempwe ni yaawo. "Atthu a khalayi, yeetthiwaka ni Eroho Yowarya, aamulepa Bibilia." Awo yaari maprofeta. Masu yaarwa wa yaawo vano yaanilepa, yaanilepa, ni muupuxeryo. Yoopacerya awo yaakhala maprofeta oosuwanyeihiwa, vano awo—awo yaanilepa Masu a muupuxeryo, ni yaanikhalana otaphuleliwa wa muupululo wa Muluku okhala wira aari Muluku mwa mutthu.

⁸⁸ Vano ti siiso Owo iisooniihenry'awe Mwaneene mwa mikhalelo Sawe so wiisuwanyeiha, soowoona saya silipiheriwaka, waari mukhalelo wa Muluku mw'awo, aisuwelihaka Mwaneene w'atthu.

⁸⁹ Vano, eyo t'inamuna emosa paahi Owo aary'awe mwa Kristu. Profeta aari epantte yaamukhaani paahi. Kristu aari omalela wa Muluku. Nto Muluku aari mwa Kristu, aataanihaka olumwenu ni Yoowo. Ni mikhalelo Sawe saahimusuwanyeiha, etthu Owo aary'awe, mpakha Owo wira, "Kaahivareke mitoko s'Atithi Aka, weso muhaamini. Kaahikhalane mukhalelo w'Atithi Aka, weso muhikaamini, muhaaminiki moolumo Aka. Kaahikhalane

mukhalelo w'Atithi Aka mwa Miyo, weso muhaaminiki, mnakhala.”

⁹⁰ Vano, mikhalelo Sawe khasinarukunuweke. Muluku khokhanle orukunxaka mukhalelo Awe, hata vakhani ntoko—ntoko mwa—mwaapwittipwitthi ohinwery'awe orukunxa mukhalelo awe, wala etthu p'itthu ekina orukunxa mikhalelo saya. Okhala wira, yaakhalakaru mwa oloka waya, ti yooloka. Nto nyuwo mwarukunxaru etthu p'itthu, nto moorukunxa oloka waya.

⁹¹ Enikhala ntoko mwaakhanle okuxa e—ekuluwe yoothiyana, khurapiha ekuluwe yoothiyana khu—khuhela etinta ele mmakwarikhwani mw'aya, ntoko siniir'aya athiyana, n'utthokiha n'epato, n'uwaraha n'evistiitu yooreera. Muhiye ekuluwe eyo, eyo enoorowa naanaanoru vamaroveni, n'uwolowasa-tho. Mwaha wa xeeni? Eyo ekuluwee, ti yeeyo tu. Masi, nto, masi, moosuwela, nyuwo khamwaarowa opaka . . .

⁹² Mwaapwittipwitthi khaarowa wira eyo. Owo hata khonrowa okela mmattopheni mme. Owo khonthhuna hat'etthu n'iyoy. Ti mikhalelo saya. Munnona? Nyuwo pooti omuwariha muthinto mmosaru wa ikuwo, masi owo vekeekhai khonrowa, owo vekeekhai khonrowa. Ele ya vate khencala; ti muhina. Vano, Muluku aryeene ephattuwele y'ekumi yothene . . .

⁹³ Muhivonye wiiwa ela. Kineeserya, ni sothene siri mwa miyo, wira moone etthu. Munnona? Ti ya mureerelo anyu, apatthani. Ti mwa—mwaha wa nyuwo. Munnona?

⁹⁴ Miyo nkirwiiye va wira kooniwe paahi. Nkirwiiye va, mwaha w'ohikhala nipuro nikina n'orowa. Kirwiiye va okhala wira kirimoona otthuna orwa va. Kirimoona wira muteko Apwiya akivahaly'aya ohaana wooniheriwa eriyari y'atthu va, nto kineeserya owiirihani nyuwo wona etthu Muluku ekhanly'awe vano. Owo ti Masu Awe oolaiheriwa. Owo okathi wothene ti Masu, ni oniisuwanyeiha Mwaneene ni mukhalelo Owo ohimaly'awe. Aakhanle mutthu aarowa okhumelela okathi mmosa, aarowa okhala mwa Masu, vano mukhalelo wa mutth'ula aatthuneya wira akhumelele waamusuwanyeiha wira owo ti mutthu ene.

⁹⁵ Mwaha wa yeeyo Yesu aarin'awe okhala Ole aary'awe. Awo yaahaana wira yoonne-ene. Khivanxankiha awo yahoon'aya. Etthu ene . . . Khwiriwa, onamwi Owo aapanke miiriirya sinci-ene, nlelo awo khayaawerya waamini, okhala wira Yesaya aahihimya, “Awo aakhalana maitho nave khanwerya wona, maaru nave khanwerya wiiwa.” Munnona? Khula okathi, kahi okathi Awe paahi; masi khula okathi, moota, “Muluku, khalayi, n'inamuna sinci-ene,” nlelo awo khayaawenrye wiiwa.

⁹⁶ Vano, mikhalelo Sawe khasinavonye. Kweekwe enamuna emosaru. Vano, muupuwele, mukhalelo Awe, mukhalelo wa Muluku, khokhanle ovonyaka. Wavonya vale, weso Muluku

oovonya. Ni Bibilia oohimya, mwa aHeperi 13:8, wira, “Yesu Kristu mmosaru nsana, olelo, ni mahiku othene.” Tivo, Owo ti Muluku ohinrukunuwa. Khula mukhalelo Owo aary’awe wopaceryani, Owo nlelo mukhalelo yoowo mmosaru. Khula enamuna Owo ovanry’awe muteko, mwa khula okathi Owo otonko awe wira etthu, Owo oniira enamuna emosaru khula okathi. Owo aahiire, ti mukhalelo Awe orukununwe, moone, ni mikhalelo Sawe saamurowa wooniherya etthu yaaharowa okhala ya Muluku. Munnona? Tivo hiyo khanaarowa osuwela vatthu. . .

⁹⁷ Ntoko Paulo sihimaly’awe, “Nlope narumiha nsu noohisuwanyeya, t’ani onrowa wiitthokiherya ekhotto, nlope naruma nsu noohisuwanyeya?” Vano nlope naruma wira “otthika,” ti yeeyo erin’ahu wira, otthika. Nlope naruma wira “owana,” ti yeeyo entthuneya hiyo wira, owana. Masi Nlope exeenii? Ti Masu a Muluku. Awo annimusuwanyeiha Muluku, sinto ti—sinto “owela, okilaathi, otthika, waavitikanya akapwitthi,” etthu p’itthu. Iwo oruma wa Nlope na Muluku.

⁹⁸ Vano nsu noohisuwanyeya, Bibilia aahimyaka wira etthu khata ehaana wiiraneya; mutthu khunaira, “Oh, eyo yaari ya nihiku nikina, eyo.” Vano nookhala nsu noohisuwanyeiha vo. Vano khamunsuwela yo wira.

⁹⁹ Yesu ohimye wira, “Kookhalana owerya w’ovaha ekumi Aka khuvenxa-tho.” Khanivo nsu noohisuwanyeya vo.

¹⁰⁰ Muthiyana iirale, “Hiyo noosuwela wira Mesiya onnoorwa; nto Owo arwa vale, Owo onoonileela itthu ntoko sihimaly’awe.”

¹⁰¹ Owo khwira, “Miyo ka Yoowo.” Khanivo nsu noohisuwanyeya vo. “Miyo ka Yoowo.” Uh-huh! Amen.

Awo yiirale, “Axitiith’ihu yaahilya emana mothakoni.”

¹⁰² Owo khwira, “Awo, othene, ahookhwa.” Owo khwira, “Masi Miyo ka Yolya y’Ekumi ekhumme wa Muluku Wirimu.” Khanivo nsu noohisuwenyeya. “Miyo ka Mwiri w’Ekumi, w’omatta w’Edeni.” Nnari, khanivo nsu noohisuwanyeya wa yeeyo. Vekeekhai nnari. Hat’etthu yoohisuwanyeya wa yeeyo. Owo aari oolikana mwa sothene iiraly’awe.

¹⁰³ Bibilia khonvaha nsu noohisuwanyeya. Nlo ninnisuwanyeiha mukhalelo wa Muluku naarumaka.

¹⁰⁴ Yesu oohimya, mwa Yohani Oowaarya 10:37, “Kaahivareke miteko s’Atithi Aka, etthu. . .ni kaahikhalane mukhalelo w’Atithi Aka, weso muhikaaminiki. Ti seiyo, iyo sinnisuwanyeiha mukhalelo Aya mwa Miyo, mikhalelo Saya.”

¹⁰⁵ Okhala wira, Atithi ti Masu, “Wopaceryani naari Nsu, nto Nsu naari ni Muluku, nave Nsu aari Muluku,” ni mukhalelo wa Muluku onoonihiriwa ni natiri Awe a okathi yoowo.

¹⁰⁶ Vano Owo aakhanleru okathi wa Moise, khiyaarowa olikana. Ni Moise aakhanleru okathi Awe, khiyaarowa olikana.

Owo aakhanleru okathi wa Nowe, khiyaarowa olikana, wala Nowe aakhanleru okathi Awe. Nowe aalaleerya itthu sa nihiku nenle, nto mukhalelo awe ni etthu owo aapank'awe saahimusuwanyeiha ni Masu a Muluku. Moise aahiira etthu ene yeeyo.

¹⁰⁷ Nto va Yesu khurwa, vano Masu yaalaihieriwe okathi ule yaahisuwanyeihiwa mwa Yesu Kristu ni mukhalelo wa Masu, okhanle Muluku. Amen.

¹⁰⁸ Omwarexiwa wa Eroho Yowarya, mahiku ookiserya, vasulu v'atthu pure, woosuwanyeiha mukhalelo wa Muluku n'atthu. Owo aahihimya eyo. Ti Masu. Owo aahimye wira aamwiira. Khaavo onwerya okumiha-vo. Owo aahimye wira aamwiira.

¹⁰⁹ Vano itthu iya sothene Owo ohimaly'awe, ti seiyo Owo oniir'awe. Sinnisuwanyeiha mukhalelo Awe. Ayo, mulopwana. "Muhaamini iyo, muhaamini soohimya Saka, vakhala wira mukhalelo Aka kuhiyo yoole wa Muluku."

¹¹⁰ Vano nwehe mwa Yohani 14:12, "Ole onikaamini," Owo ohimye wira, "ookhalana osuwanyeya Waka, mukhalelo Aka. Ole onikaamini, onoovara miteko Miyo sinvar'aka nave." Eyo ennisuwanyeiha wira mukhalelo wa Kristu ori mwa yoowo, ooniheryaka mikhalelo sa Yoowo. Amen.

¹¹¹ Kinnoona okhala natiini saana vano, hata kilalaka vammilo. Ayo, mulopwana. Oh, wulu! Moone, khuuvo ovonya wa Yeeyo! Ekumi Awe! "Ole onikaamini, onoovara miteko sinvar'aka nave." Moone, eyo ennisuwanyeiha mukhalelo.

¹¹² Etthu emosaru Owo ohimye'awe: "Mukhalelo Aka waahikisuwanyeiheke Yoomi," Muluku mwa—mwa Yoowo, vano Owo...muhimukupali. Vano, Owo nave-tho oohimya wira aamurowa osuwanyeihiwa mwa yeeyo. Vano, eyo, yaahimusuwanyeiheke Yoowo, weso kuhiyo ele Owo onihimye'awe.

¹¹³ Ni, olelo, Kristu aahisuwanyeiheke Mwaneene, mukhalelo wa Kristu onnisuwanyeiha hiyo okhala a Kristu, naaminiki Masu...Yesu aari Masu, tivo Owo aahaana waamini Masu. Nto ninwerya sayi hiyo ohimya wira na a Kristu, vano n'ukhootta khula Masu a Bibilia owo? Eroho Yowarya ya Kristu ti Muluku mwa nyuwo, ni Eyo enoommaliherya khula natiri ni "Amen." Bibilia ohimye wira. "Ithooneryo iya sinimwaatthara ale anrowa waamini." Eroho ya Muluku khwira, "Amen." Munnona?

¹¹⁴ Emosa wa seiyo kheniira, "Nnari, eyo yaari y'okathi mukina; eyo yaari y'awiixutti paahi."

¹¹⁵ "Murowe mulaponi mothene mwaalaleerye Ehapari yooreera atthu othene. Ole, khula nipuro mulaponi, onrowa waamini, ithooneryo iya sinoomutthara, etthu emosaru." "Mmosaru nsana, olelo, ni mahiku othene," mukhalelo osuwanyeihiwaka.

116 Eyo ennaakhaliha aHeperi 1:1, “Muluku khalayi, aalavulihaka axitiithi ni moolumo a maprofeta,” omusuwanyeiha Kristu, oohihimuwa olelo, ni mukhalelo mmosaru Owo iiraly’awe khalayi. Nyuwo mooweha? Muluku khonrukunuwa enamuna Awe.

117 mBibiliani a khalayi, okathi namaloha aakhalan’awe yooloha, nto khuhikhala profeta mulaponi wira oone sinto yooloha ele yaari yoolikana wala nnari, awo yaahikhhalana enamuna ekina y’osuwela. Aakuxiwa mutthu ene yoowo, anakhaleru pani aaloha yooloha eyo, khuroihiwa mpaani m’okokhorela. Ekuwo ya vatthirima y’Aroni, yoowo aari mukhulupale aanamukuttho, yaamuthomeiwa vanripuni. Nto namaloh’ola aamuthariha yooloha ela. Hata wira yaakhala ntoko yoorera, yaakhala ntoko y’ekeekhai; waahikhhaleru Waarya wuulupale wooneela vamaalukuni vale, onihaniwa Urimi Tumimi (anammusoma Bibilia annisuwela saana); vano, nkincala moota xeeni yaakhal’aya ntoko y’ekeekhai, khayari siiso. Ohilimaleleya wa Muluku, mukhalelo wa Muluku, waahaana wooniherya mikhalelo Sawe mwa enamuna yuulupale, wira ooniherye wira Owo ohiisuwanyeiha Mwaneene mmutthakani. Amen.

118 Kinihimya etthu emosaru ohiy’ula. Urimi Tumimi a khalayi oorowa, masi Masu nlelo t’itthu ensuwanyeiha mukhalelo wa Muluku, natiri a okathi onkhal’ahu. Vo siri mikhalelo sa Muluku sinsuwanyeihiwa ni natiri a okathi onkhal’ahu.

119 Eyo ennimukhalihaka Muluku mmosaru ntoko Owo saary’awe. “Khalayi,” nkawehani, “n’inamuna sinci-ene, Owo aahaalavuliha axitiithi ni moolumo a maprofeta.” “Vano ikano ni maprofeta yaahikhala mpakha Yohani; okhuma vaavo, Omwene wa Wirimu.” Nwehe, “Masi nihiku nla nookiserya,” alavulaka etthu emosaru Owo aalavunly’awe okathi ule, “mwa Mwan’Awe Kristu Yesu.” “Muluku, khalayi, n’inamuna sinci-ene, aahaalavuliha axitiithi ni moolumo a maprofeta; nihiku nla nookiserya,” airaka etthu emosaru, “aalavulihaka atthu (axitiithi) ni moolumo a Mwan’Awe Kristu Yesu.” Oomuhihimuxa Owo mw’alipa-ookhwa, vano Owo onkhala mwa hiyo, aisuwanyeiha Mwaneene ni anihimeeryaka itthu khalayi ene, wira Owo onnilamula miyuupuwelo ni sintthun’aya murima. Yesu Kristu mmosaru nsana, olelo, ni mahiku othene! “Muluku, khalayi ni n’inamuna sinci-ene aahaalavuliha axitiithi ni moolumo a maprofeta, masi mahiku ala ookiserya ni moolumo a Yesu Kristu Mwan’Awe.” Khivanweryaneya orukunxiwa Yolempwa. Ti yoolikana.

120 Ntoko sihimaly’aka khalayi, Muluku khommutthuna hata mutthu otaphulela Masu ala. Owo onnitaphulela Masu Awe Mmansawe. Owo ahimya etthu p’itthu, eyo kwiiraneya, iwo p’utaphuleliwa waya. Munnona? Owo khommutthuna hata

mutthu wira, “Ahe, kookupali wira anihimya *ela*.” Muluku onnisuwanyeiha mwaha w’otaphulela Wawe Mwaneene.

¹²¹ Ti, natiri akhala a nihiku nenlo, khanikhanle okhalaka mmuthukoni mwa—mwa—mwa Lutero, khanikhanle okhalaka mmuthukoni mwa Wesley, khanikhanle okhalaka mmuthukoni mwa hata mmosa a yaawo. Nihaana okhala Mmuthukoni olaiheriwe nihiku nla.

¹²² Ankhi Moise aaronwe wEjitu, khwira, “Ahe, ninrowa oteka ekalawa yuulupale. Ninrowa ottelema nikhumaka elapo *ela*. Muro Nilo onrowa owela”? Awo yaamutthikela oweha isapala; khuuvo natiri a yeeyo. Ti yeeyo. Masi, moone, owo aahisuwanyeiha ntoko profeta a Muluku, maana etthu aahimaly’awe yaahiraneya, vano awo yaahisuwela wira owo aahikhalana Masu a Apwiya. Farawo aarina mavaka, masi Moise aarina Masu. Vano vaphiyaly’aya ophareya, mavaka othene yaamorenle vathi mphareya; nto Moise khwaakuxa atthu a Isarayeli mpakha epantte akina y’ephareya, vathi voowuuma, okhala wira owo aarina Masu, ni owo aari Masu a okathi ule. Moise aari Masu owooniheriwa a okathi ule.

Eliya aari Masu owooniheriwa a okathi ule.

¹²³ Kristu ti Masu owooniheriwa, ni anatiri Owo aamuhimaly’awe. “Woohala okathi vakhani vano olumwenku khunrowa-tho okoona; nave nyuwo munookoona, maana Miyo kinookhala ni nyuwo, hata mwa nyuwo, mpakha omala olumwenku. Miteko Miyo sinvaraaka nyuwo munoovara nave.” Owo oolaiherya itthu iya. Exeeni iyo? Ti mukhalelo wa Muluku ooniheryaka Masu Awe, ntoko Owo siiraly’awe mwa okathi wothene.

¹²⁴ Malakhiya 4, Owo ohimye wira, “Nihinatthi ophiya nihiku nuulupale ni noowoopiha n’Apwiya, moone, Miyo kinimoorumihelani profeta Eliya; nto owo onoohokoloxa waamini w’ana otthikela w’axitiithi, nihinatthi ophiya nihiku nlo.” Owo oohimya yeeyo.

¹²⁵ Yesu oohimya, kapiitulu 17 ya Luka Oowaarya, “Ntoko saary’aya mahiku a oSotoma, siiso onookhala orwa wa Mwaana a mutthu, okathi Mwaana a mutthu onrow’awe wiisooniherya.” Okathi wuupululiwa onrow’aya wiisooniha, mahiku olumwenku onrow’aya okhala ntoko Sotoma, enrowa okhala exeeni? Mukhalelo wa Yoolempwa ele emaliheriwaka. Muluku aisuwanyehaka Mwaneene ni mukhalelo Awe, mikhalelo seiyo Owo onikhal’awe kweekwe. Owo khokhanle ohiya eyo.

¹²⁶ Mahiku ookiserya, Owo ohiisuwanyeiha mwa Mwan’Awe. Nwehe moota Muluku onii’awe iya okathi wothene e. . . moota Owo kwe-. . . Owo khonrukunxa enamuna Awe.

¹²⁷ Alopwana ala araru yaalavunle n’Abrahamu, ntoko saalavul’ahu vale, mahiku a oSotoma.

128 Abrahamu aari mutthu aamwaamini Muluku. Owo aamutthanre Muluku mwa natiri Awe. Sara, mwaar'awe, aarina iyaakha miloko mithanu na mosa ni thanu, Abrahamu aarina miloko mithanu na miili ni thanu, okathi Muluku omwiihann'awe. Owo kuhimya wira awo yaamurowa okhalana mwa—mwaana; Abrahamu aamurowa okhalana mwaana ni Sara. Siiso ekhalaka yootheiha vakhani, masi miyo kinnitthokelela wira owo aahitthokiha ixa—ixapattho sothene sikhani ni maalufinete, n'itthu sothene, soolikana, okhala wira awo yaamurowa okhalana mwaan'ola.

129 Vaviraly'aya mahiku miloko miili ni mathanu na mararu oopacerya, vano, khino Abrahamu aahimuhimeerya Sara, "Munoona sayi, oophentiwa?"

"Khiivo evirikanne."

"Avuwihawe Muluku, ninoorowa okhalana, khula enamuna."

"Munsuwela sayi?"

"Muluku ohimnye siiso."

Khuvira eyaakha emosa. "Munoona sayi, oophentiwa?"

"Khiivo evirikanne."

"Ninoorowa okhalana, khula enamuna. Muluku ohimnye siiso."

Iyaakha thanu kuvira. "Munoona sayi vano, oophentiwa?"

"Khiivo evirikanne."

"Ninoorowa okhalana, khula enamuna. Muluku ohimnye siiso."

130 Yaari exeeni? Owo aahikhalana natiri a Muluku. Owo aanimwaamini Muluku, ni aaniira ntoko Muluku: owo aahivarela Masu a natiri. Eyo. . .

131 Iyaakha miloko miili ni thanu kuvira. Ixapattho khukhala sa ncano, masi owo nlelo aanivarela. Vano owo ohuuluvala, ni ookhurupuwa, ni ori mukhalelo woonanara; ni mmirimani mwa Sara ntoko waakhwiye, ni owo t'owuupaala. Vano mukhalelo xeeni awo aris'aya-mo!

132 "Munoona sayi, Abrahamu, tiithi a maloko?" apatthani awe oowiipaka waamini ti yaamwiirela.

133 "Ahe, avuwihawe Muluku, kinnoona saana. Ninoorowa okhalana mwaan'owo, khula enamuna." Okhala wira owo khaamuhovenrye natiri a Muluku mwaha wo ohaamini; masi aahikhalana ikuru, amuttottopelaka Muluku, okhala wira owo aahikupali mara wira etthu Muluku ohimaly'awe, Muluku onniwerya opaka. Amen. Vo ti vari mukhalelo wa mulipa-oowaamini.

134 Ankhi nyuwo? Munnona? Ankhi hiyo, aana a Abrahamu? Ninnisuwanyeihiwa ni Masu a Muluku, ntoko natiri, ni

mukhalelo ahu onnininisuwanyeiha, wira vekeekhai ninnaamini Yaawo? Wala, hiyo ninooova paahi, otupha okhuma *nno*, ni *nno*, ni *nno*, ni waanyiherya, ni weetta nihovaha iwo, mwaha wa Yaawo? Vano, hiyo khanihiyo aKristu, hiyo nnimwiipaka paahi wira ninnaamini.

¹³⁵ Masi, vekeekhai nakhalaru oororomeleya ni natiri uwo, n'umukuxa vale khukhala ni Yoowo! Abrahamu aahiira.

¹³⁶ Vano hiyo ninnoona wira, nihiku nimosa owo aahiwoona alopwana araru erwaasaka, yeettasaka. Bibilia oohimya va, "Naari nihiku nooviha," khino waari othana eriyari. Alopwana ala yaahirwa ni yaalavula ni yoowo. Hiyo ninnisuwela wira anli aya yaaronwe oSotoma. Kookupali wira naahilavula eyo ohiyu umosa. Mmosa aya aahanle ni yoowo.

¹³⁷ Nkanweheni Mulopwan'ola owo aamwiihann'awe... aahanle ni yoowo, etthu Mulopwan'owo iiraly'awe. Mmosa aasuwanyeihiwa ni mukhalelo Awe, wira Owo aari Elohim.

¹³⁸ Elohim, nuulumo noopacerya mBibilini, "Wopaceryani Muluku..." Vano, khula mmosa a nyuwo musomme munnisuwela wira nuulumo nlo *Muluku* vo nnihimya, mw'eHeperi, ti "Elohim." enihimya, "Oowerya sothene, oomalela mwa sothene, ole ookhala mmansawe," khomphavela hata mukhaliheryo wa mutthu, khomphavela otaphulela wa hata mutthu; Owo oniira Mwaneene. Owo ti Muluku oomalela mwa sothene, onikhala mapuro othene, oosuwela sothene, oowerya sothene. Owo Mulukuu.

¹³⁹ Owo aaphwanyaneya vale. Nto Abrahamu vano, tiithi ula aalimpe ni Masu, aahimuweha Mulopwan'ola. Vano okathi Mulopwan'ola aarukunuwenly'awe ettuli awe muheemani, Owo iirale, "Ari vayi amwaar'inyu, Sara?"

Khwira, "Awo ari muheemani, ottuli Wanyu."

¹⁴⁰ Khwira, "Kinoorowa wooxekuryani okathi yoola w'ekumi, nto munookhalana mwaan'ola Miyo koolaihenry'akani."

¹⁴¹ Nto Sara khutheya mwaha wa yeeyo. Vano Ole aalavula n'uwo, khumuhimeerya etthu Sara aahimaly'awe muheemani, ottuli Wawe.

¹⁴² Vano, mwa Maphattuwelo, munoosoma yeeyo. Ninnoona wira nto, Abrahamu, vaamanly'awe Mulopwan'ola wiisuwanyeiha...

¹⁴³ Yaari exeeni iyo? aHeperi, kapiitulu 4, eversiikulu 12, ehimye wira, "Masu a Muluku t'otepexa wiitha, ooweryaxa onvikana xoowa oniitha ninno ninno, anlamula miyuupuwelo ni sintthun'aya murima."

¹⁴⁴ Owo aahisuwela wira ola aari ti Mulopwana ene. Owo aahisuwela wira khiyaakhanle maprofeta mulaponi woohikhala yoowo, nto tivo Masu a Apwiya yaamurwenly'aya yoowo. Vano owo aari profeta, ni va Masu yaamurweenle profeta.

145 Etthu emosaru ni Yohani Mpatisa. Khaakhanle profeta iyaakha imiya xexe. Kinnuupuwela. . .

146 Khino Totori Davis mutokweene okilanthe vaava, ohiy'ula, mulaleyi mutokweene a Patista Misionariya okipatisale moWaaminini. Owo aanivaanyihanaka ni miyo. Owo khwira, "Billy, nyuwo mwa mwaana paahi vano. Muhaana okiwiriyana miyo."

Miyo khwira, "Vaareera, Munna Davis, kinoowiriyana."

147 Owo khwira, "Moone, Yohani khaapatisiwe. Vano owo aamupatisa, masi khaapatisiwe; khaavo aaphwanela omupatisa owo." Owo teyologiya ooreera a ePatista. "Nto va onoorwa Yesu, khwira nto. . . Yohani khwira, 'Miyo kiphwanenle opatisiwa ni Nyuwo; Nyuwo munrweelani wa miyo?' Vano Owo khwira, 'Muhiye ekhale siiso.'" Owo khwira, "Vano nto 'vamuhiyaly'awe' Owo," khwira, "moone, vano Yesu aahimupatisa Yohani. Vano nto okathi Owo okhummy'awe mmaasini, nto erimu khutthukuwa vano Owo khumoona Muluku mwa mukhalelo w'epompa, ekhuruwaka erwaaka vasulu Vawe, khwira, 'Ola Mwan'aka onimphentex'aka, mwa Yoola Miyo onnikisivela okhala.'" Masi, kahi, kihimuvaanyihaka Totori Davis, masi owo aahivonya.

148 Moone, Yohani aari profeta, ni Masu kweekwe anoorwa wa profeta. Tivo vakhala wira Masu yaahiipaka erutthu, Awo yaahaana orwa wa profeta, khula enamuna; 'okhala wira, owo aakhalela onamoona Masu, ni khula mukhalelo awe waahimusuwanyeiha wira aari yeeyo. Va anoorwa Masu, vano exeeni yaakhumelenle? Vaphiyaly'awe ohoolo wa Yesu, Yohani khwira, "Miyo kiphwanenle opatisiwa ni Nyuwo; Nyuwo munirweelani wa miyo?"

149 Yesu khwira, "Muhiye ekhale siiso, maana ti siiso sinreerel'aya hiyo (ennitthun'aya) weetela exariya yothene." Yohani ary'e'ne profeta; Owo ary'ene Masu. Owo aari Mukuttho, ni Owo aatthuna okela mmutekoni mw'Awe w'elapo ya vathi, nto Mukuttho waahaana orapihiwa ohinatthi ovahereriwa. Vano Yohani khumpatisa Owo, 'okhala wira owo aahisuwela. "Muhiye ekhale siiso, maana ti siiso sinreerel'aya weetela exariya yothene." Mukuttho waahaana orapihiwa ohinatthi ovahereriwa, nto tivo Yohani khumpatisa. Khaari Yesu aamupatinse Yohani. Yohani t'amupatinse Yesu. "Muhiye ekhale siiso."

150 Nwehe, va aaphwanyaneya Abrahamu, n'uwo aahikhalana Masu a Apwiya. Masu a Apwiya yaamurweenle yoowo. Owo aari profeta. Nto vano va anoorwa Masu. Owo khumwiihana, "Abrahamu," kahi *Abramu*.

151 Mahiku vakhani eyo ehinatthi, nsina nawe aari Abram— aari Abram, vano ti Abrahamu. Amwaar'awe yaari Sarai, vano

ti “Sara,” kahi S-a-r-a-i; S-a-r-a. Kahi (A-b-r-a-h-a-m-u) A-b-r-a-m-u, masi A-b-r-a-h-a-m-u, Abrahamu.

¹⁵² Vano Mulopwan’ola aahiisuwanyeiha Mwaneene, okathi Owo iiraly’awe, “Abrahamu!” Oh, wulu!

Abrahamu khwira, “Elohim!”

¹⁵³ Vo ari Masu ni profeta, vamosa, atthu oowanli oosuwanyeihiwa.

¹⁵⁴ Elohim, Owo khwira, “Amwaar’inyu ari vayi, Sara?”

¹⁵⁵ Khwira, “Awo ari muheemani, ottuli Wanyu.” Nto e. . . Vano mwiiriirya waahipakiwa. Elohim! Abrahamu aahimwiihana Owo, “oomalela mwa sothene, Oowerya sothene, Muluku oowerya sothene.”

¹⁵⁶ Yesu oohimya, okathi Owo aary’awe elapo ya vathi, Owo aahiira etthu emosaru Elohim iiraly’awe. Eyo yaahisuwanyeiha mukhalelo Awe w’okhala Muluku.

¹⁵⁷ Vano Owo iirale, khalayi, “Mahiku ookiserya, okathi ene yoowo w’orwa wa Mwaana a mutthu, okathi Owo onrow’awe wiisooniherya, etthu ila enookhumelela-tho, ntoko saary’aya oSotoma.” Elohim eriyari y’atthu Awe, Muluku Oowerya sothene! Ti yeeyo Yoolempwa enihimy’aya. Elohim eriyari y’atthu!

¹⁵⁸ Iyaakha miloko mixexe Owo onnipatista ni Eroho Yowarya, Elohim, Muluku! Ni ekereja. . .

¹⁵⁹ Nkawehani, Abrahamu ahoona ethoonyeryo, wiihaniwa okina; ethoonyeryo, wiihaniwa; wiihaniwa, ethoonyero; anwehereryaka mwaan’ole oolaiheriwa. Masi ethoonyeryo yookiserya owo oonaly’awe, orwa wookiserya, oxejurya wookiserya wa Muluku mwaana oolaiheriwa ahinatthi orwa vanlakani, aari Elohim mw’erutthuni ya mutthu. Vano mwaana oolaiheriwa khurwa.

¹⁶⁰ Vano Osuulu w’Abrahamu ommuwehererya Mwaana oolaiheriwa, Yesu Kristu. N’awo annoona ithoonyeryo, omwaraxiwa w’Eroho Yowarya, olavula ilavulelo, ovoniha wa Muluku, ni sikina. Masi okathi Mwaana a mutthu oniisoonihery’awe, Elohim onookhokolwela Osuulu w’omwene wa Abrahamu ni wooniherya etthu emosaru Owo ooniheny’awe nihiku nle, amen, Elohim, p’uhimya wene! Mwaha wa xeeni? Onrowa okhala mukhalelo wa Muluku.

¹⁶¹ Vano, vakhala wira Kristu aari Muluku, “Woohala okathi vakhani olumwenku khunrowa-tho okoona; masi nyuwo munoookoona, maana Miyoko kinookhala ni nyuwo, hata mwa nyuwo, mpakha woomalelani, emalelo. Miteko sinvar’aka nyuwo munoovara nave.”

¹⁶² Yesu oohimya yeeyo mwa—mwa Luka, kapiitulu 17. Vaareera, naaminiki vale ni woona mahiku ala ookiserya, yookhumelela eri wira yooniheriwe-tho.

163 Tivo, aHeperi 1:1, “Muluku, khalayi mwa maprofeta aahisuwanyeiha Mwaneene, mahiku ala ookiserya oosuwanyeiha ohihimuwa wa Mwan’Awe mw’alipa-ookhwa,” avahaka Ekereja mukhalelo mmosaru Owo aarin’awe, amukhalihaka aHeperi 13:8 oolikaneene.

164 Hata mapururu khampheliwa mwa yeeyo. Awo mapururu a xawawe. Awo ankhala oolipa, okhala wira awo axipalame a wirimu. [Nipuro vahiitthu mufiitani—Mol.] . . .awo anaalyiha yolya y’axawawe.

165 Vano hiyo ninniweha wira, “Khalayi, n’inamuna sinciene, Owo aahaalavuliha axitiithi ni moolumo a maprofeta, mahiku ookiserya ni moolumo a Mwan’Awe Yesu Kristu, amuhihimuxaka Yoowo mw’alipa-ookhwa.” Nto va Owo ori eriyari ahu, vaviraly’aya iyaakha ikonto piili, Yesu yoowo mmosaru, kahi mmosa wa maprofeta; Yesu, aleluya, Mwaana a Muluku oohihimuwa!

166 Yesu aahihimya, nihiku nimoso, Owo iirale, “Nloko nootakhala ni noohiiwelela ninvekela ethoonyeryo, vano animwaakhela ethoonyeryo.” Nloko nootakhala ni noohiiwelela. Okathi xeeni olumwenku waatonko aya okhala wootakhala, wala woohiiwelela ni woohononeya, ovikana vano?

167 “Ntoko saary’aya mahiku a Yona, ntoko Yona saakhanly’awe mmirimani mwa nankumi mahiku mararu othana n’uhiyu, siiso Mwaana a mutthu ohaana okhala mmahiye mahiku mararu othana n’uhiyu.”

168 Vano, “nloko nootakhala ni noohiiwelela” naarowa waakhela ethoonyeryo. Muthinto xeeni w’ethoonyeryo? Ethoonyeryo ya ohihimuwa. Vano hiyo nookhalana eyo olelo, siviraly’aya iyaakha ikonto piili, Owo nlelo mukumii. Owo ori eriyari ahu, ohiy’ula, mmosaru nsana, olelo, ni mahiku othene, aisuwanyeihaka Mwaneene ni mikhalelo sa Muluku, ooniheryaka Masu nihiku nla Owo aahimaly’awe wira. Amen.

169 Vo ti vari Masu. Vano nyuwo munimwaamini ethoonyeryo ela? t’itthu enttharelana, mahiku ookiserya, mukhalelo Awe mwa Mwan’Awe. Nwehe.

170 Muluku aahimuhimeerya Moise khalayi. Mwa Otumererya 18:15, khwira, “Apwiya Muluku anyu anoomuthanla Profeta onlikana ni Miyo.” Vano nwehe. Awo Masuu. Awo Masuu. Owo aari Muluku. Owo khaari Moise. Moise aarowa osuwela sayi yeeyo? Owo aari mutthu. Masi Muluku, alavulaka mwa Moise, aahihimya yeeyo. Nyuwo munnaamini yeeyo? Vaareera.

171 Vano nkanweheni Yesu, nwehe moota Sawawe—mikhalelo Sawe saasuwanyeihaly’aya Masu ala oolaiheriwa ntoko eekeekhai. Owo vekeekhai aahiira. Owo aahisuwanyeihiwa ni mukhalelo ola Moise aahimaly’awe wira Owo aamukhala.

172 Anci-ene aya, ntoko olelo, anthhuna omoona muhooleli mmosa muulupale. “Oh, ola ti Totori Ph. *Lexe ni lexe*. Owo osomme Exikola yuulupale Hartford.” Wala, “Owo osomme nipuro nimosa nuulupale siiso.” Iwo kahi wiisuwanyeiha wa Muluku. Nnari, nnari. Kahi yeeyo. Masu t’ammusuwanyeiha Muluku. Munnona?

173 Yesu khaari oosoma, nnakhala namukuttho, nnakhala rabbi, a olumwenku. Owo aari ookhotta, a olumwenku.

174 Masi Muluku aalipiherya Masu Awe mwa Yoowo, yeeyo yaamukhalinhe Emanuweli. Iwo ti waari osuwanyeya Wawe. Vano, va, Yesu amaliheryaka yeeyo voolikaneene etthu Muluku khalayi aahimaly’awe wira Owo aamwiira, mwa Moise, etthu Owo aarow’awe wira.

175 Vano nkawehani okathi Owo omusuwenly’awe Petru, ntoko saahimyanx’ahu ohiyu umosa, okathi Owo omusuwenly’awe Petru vano khumuhimeerya Petru nle naari nsina nawe. Ethoonyeryo ela yaahisuwanyeiha soohimya Sawe s’oMesiya, wa Petru, maana Masu yaahihimya wira, “Apwiya Muluku anyu anoomuthanla Profeta.”

176 Vano Petru khwaattama, yoowo aari Simoni nto, khurwa vaavo Owo aary’awe. Nto Yesu khunweha, khwira, “Nsina nanyu ti Simoni, ni nyuwo mwa mwaana a Yona.” Eyo yaahisuwanyeiha mukhalelo wa Kristu okhala Masu yaale Moise aahimmy’awe. Petru khusuwela wira ethoonyeryo ele yaamusuwanyeiha Yesu ntoko Mesiya. “Muluku aari mwa Kristu,” mureeriho wa mahiku ookiserya. Wa Natanayeli. . . Muupuwele, Owo aahimuhimeerya Simoni nsina nawe.

177 Vano, nwehe, wa Natanayeli Owo aamuhimenrye etthu airaly’awe. “Nyuwo mwaari vathi va mwiri okathi Miyu owoonaly’akani.” Eyo yaamusuwanyeiha Owo okhala Mesiya.

178 Khwira, “Nyuwo mwa Mwaana a Muluku. Nyuwo mwa Mwene a Isarayeli.” Owo aahisuwanyeihiwa ni mukhalelo wa Masu yaalaihieriwe wira Owo aahaana okhala Mesiya. “Apwiya Muluku anyu anoomuthanla Profeta.”

179 Mwamuthiyana veehimeni, Owo aamuhimenrye ele aary’awe, nto eyo khimusuwanyeiha Owo ntoko Mesiya ola aalaihieriwe. Munnona?

180 Mukhalelo Awe, mikhalelo Sawe, saari Masu asuwanyeihiwaka. Saari mikhalelo Sawe sooniherya wira Masu yaari Muluku, vano owo aari Muluku oosuwanyeihiwa mwa Kristu. Vano nwehe. Nkawehani.

181 Wa Petru, Owo aasuwanyeihiwe wa Petru mwaha w’ohimya nsina nawe. Owo aaisuwanyeihiwe wa Natanayeli mwaha w’omuleela etthu iiraly’awe. Owo aasuwanyeiye ni muthiyana, mwaha w’omuleela ele aary’awe. Etthu owo. . . aari pani *ole*; etthu *owo* iiraly’awe; ni exeeni *ole* aary’awe. Owo

aahisuwanyeiha mukhalelo Awe w'oMesiya, waari wira okhale mukhalelo wa Mesiya.

¹⁸² Nkanweheni mwaamuthiyana ohimya etthu emosaru. "Napwiya, kinoona wira Nyuwo mwa profeta. Hiyo khanrina profeta iyaakha imiya sene. Naahikhalana ikereja sinci-ene, wuukhuwa wunci-ene ni ivirikanelo sa miromolelo, masi khanrina profeta iyaakha imiya sene. Hiyo noosuwela wira Mesiya arwa vale, ela t'itthu enrowa omusuwanyeiha Owo."

¹⁸³ Owo khwira, "Miyo ka Yoowo, onlavula ni nyuwo." Khiwaakhanle ohisuwanyeya wa yeeyo, "Miyo ka Yoowo." Eyo yaahimusuwanyeiha.

¹⁸⁴ Muthiyani'ole aavuuva ephome, aahimusuwanyeiha Owo okhala Masu. Sayi? Mwaha w'etthu Owo iiraly'awe okathi waamini wawe omukwanyaly'aya. Owo khurukunuwa khwira, "T'ani okikwanyale?" Owo aahisuwela wira yaahiiraneya etthu. Eyo yaahimusuwanyeiha Yesu ntoko Mesiya.

¹⁸⁵ Owo khwaamini, nto khwira, "Kaweryaru okwanyanya nlaya Nawe, kinoopenuwa."

¹⁸⁶ Vano akwanyanyaku, Owo aahirukunuwa khwira, "Vano t'ani okikwanyale?" Vano othene aya khukhoota. Masi mukhalelo Awe w'oMesiya . . .

¹⁸⁷ Amen! Kinwehererya wira munimoona yeeyo, muthukumano. Nwiriyane, okathi ommalih'ahu.

¹⁸⁸ Iwe owo aahimukwanyanya Owo. Yaahikhala imiya sene, khino, yaatthuna omukwanyanya. Petru hata aahimuulumela, khwira, "Ahe, othene anookwanyani Nyuwo."

¹⁸⁹ Owo khwira, "Ayo, masi ookhala okikwanyale voovirikana." Eyo t'evirikanelo, okwanyanya weiwo wa waamini. Munnona? Khwira, "Ookhala okikwanyale. Waari okwanyanya woovirikana. Miyo kootteettheya. Wookhuma owerya mwa Miyo. Ikuru sookhuma mwa Miyo." Vano, vale omphwanyaneya Yoowo.

¹⁹⁰ Vano, hata mwixutti Awe airaka, mwa moolumo makina, "Nyuwo munikhala—munikhala ntoko mwa mutthu oopahuwa. Vano, atthu, atthu othene anookwanyani Nyuwo."

¹⁹¹ Nkawehani Yawawe, nkawehani osuwanyeya Wawe vano. Owo khurukunuwa, khuwehaweha muttitthi. Owo khumphwanya. Owo khaawenrye wiisiipithiha-tho. Aahimutharihela ekhalelo awe, khwira, "Waamini wawe waahinvoniha."

¹⁹² Owo aahisuwela, mwa yeela, wira, aHeperi 4:12, "Masu annilamula miyuupuwelo, sintthun'aya murima." Mukhalelo Awe waahimusuwanyeiha Owo okhala "Masu a Muluku oowiipaka erutthu ekhalaka ni hiyo." Amen.

193 Miyo kinoona wira etthu emosaru yeeyo ohiy'ula ennimusuwanyeiha Owo, Yesu Kristu ohihimunwe khunakhala ni hiyo ohiy'ula, mmosaru nsana, olelo, ni mahiku othene. Vano, okhala wira aHeperi 13:8 t'ekeekhai, mukhalelo Awe onoomusuwanyeiha Owo olelo, ntoko wiiraly'aya okathi ule, enamuna emosaru.

194 Nkanweheni Keleopha n'akina, nuumala ohihimuwa. Yesu aisuwanyehale Mwaneene mwa enamuna Owo akawanny'awe mukatth'ole, wira Owo iirale siiso ntoko sairaly'awe Owo ahinatthi okhomeliwa. Vano awo...Eyo yaahisuwanyeiha mukhalelo Awe, 'okhala wira eyo t'inamuna iiraly'awe.

195 Vano Owo aakhanle vaava ohiy'ula, Owo aarowa wiisuwanyeiha sayi? Siiso ntoko Owo siiraly'awe nsana, maana Owo mmosaru olelo, nave onookhala mahiku othene. Ti osuwaneya. aHeperi 4, axexe...14 ni 15, "Owo vano..." Annihimya, "Owo ti Namukuttho Muulupale onwerya okwannyiwa n'iwereyelo w'ottettheya wahu." Owo ti Namukuttho ahu Muulupale naanaano va. Nuumala ohihimuwa Wawe, nuumala okhwa Wawe, nuumala ovithiwa Wawe, nuumala ohihimuwa Wawe, nuumala owela Wawe, amen, Owo nlelo onkhala mmosaru nsana, olelo, ni mahiku othene, Namukuttho Muulupale onwerya okwannyiwa n'iwereyelo w'otteettheya wahu. Amen. Owo ti yeeyo, naanaano va, wa khula mulopwana ni muthiyana va onrowa waamini. Owo ti Namukuttho ahu Muulupale, mmosaru nsana, olelo, ni mahiku othene.

196 Owo onikhala voohimala. Munnaamini yeeyo? [Muthukumano oniira, "Amen."—Mol.] Mikhalelo Sawe sinnimusuwanyeiha Yoowo voohihyererya okhala mmosaru ntoko Owo saary'awe okathi waakhal'awe elapo ya vathi. Owo nlelo mukumi va, ohiy'ula, mwa mukhalelo wa Eroho Yowarya. Owo onikhala voohimala. Ni mikhalelo Sawe sinnimutthara Yoowo, ntoko sinimuttharak'aya kweekwe, vakhala wira Owo nlelo onnikhala.

197 Miyo kinnixukhuru, ohiy'ula, wira, "Muluku, khalayi ni n'inamuna sinci-ene aahaalavuliha axitiithi ni moolumo a maprofeta, mahiku ala ookiserya mwa Mwan'Awe Yesu Kristu."

198 Wulu, nkaasuwela wira nkireere olavula siisaale. Kaahiliyala wira yaari siiso. Kileveleliwe. Kinrowa paahi... Kinoomaliha.

Nivekele.

199 Tithi a Wirimu, Muluku muulupale oomoriwa ikharari! Pwiya, miyo—miyo...khino nkinreere olavula. Miyo kinvekela, Muluku, kalavula vale, Nyuwo mukilevelele. Masi, Pwiya, nkikhanle ovekelaka nlevelelo mwaha w'etthu kihimaly'aka. Miyo kihimmye yeeyo Nyuwo ehimmy'anyu muhina mwa Masu Anyu va.

200 Vano nuulumo nimosa wala manli anikhuma wa Nyuwo, Pwiya, khino atthu othene va animoona eyo ohiy'ula. Ale akhaani, atthu anwereiwa anoovonihiwa awo yoonaru wira Nyuwo nlelo mwa Namukuttho ahu Muulupale. Miyo kinvekela, Pwiya, minuutu iya vakhani sinttharelana, wira Nyuwo mukhalihe Mutthak'ola okhala-tho mwa ekeekhayi. Wira ele ehimmy'aka ni Masu, mukhalelo Anyu woosuwanyeheni Nyuwo eiriyari ahu, ohiy'ula, wira Nyuwo mwa mmosaru nsana, olelo, ni mahiku othene, vano ti mwa Nsina na Yesu hiyo ninvekel'ahu. Amen.

201 Okathi vakhaani paahi vano. Hiyo, miyo—koopisa vakhani, masi mwaamutthuna ovilela voophiyerya okhalana eliinya yaamukhaani ya mavekelo mwa minuutu, muloko ni mithanu wala miloko miili? Vakhala siiso, nvenxe ntata, mwiire, "Hiyo..." Vaareera, kooxukhuru—kooxukhuru. Kaahihimya wira kaamohiyani okhuma ewoora ya neethanu na xexe ni minuutu miloko miraru. Ewoora yeeyo vano; sinihala miloko miili wira ephiye iwora muloko. Tivo mwatthunaru okivaha minuutu soophiyaka muloko paahi, miyo kinimwaakuva.

202 Nrowe noone, ittikitti xeeni sa mavekelo sikaiwe olelo? [Munna mmosa oniira, "O"—Mol.] O? Exeeni, naapacenrye vayi ohiyu ule, emosa, emosa? ["Kinoona wira yaari emosa."] Ayo, uh-huh.

203 Vano nto hiyo, nsana ohiyu, hiyo paahi . . . Eroho Yowarya . . . Miyo kaamwiiwa olelo, kittikiheriyaka ele ehimmwe. Masina kamosa-kamosa ale a eFaransa, miyo kaari . . . Eroho Yowarya; enamuna emosa paahi kaakhanly'aka wira, olipelela paahi khoona.

204 Moone, imaara sikina mwakhalanaru yoowoona, ehaana orukunxiwa khutaphuleliwa. Enotaphuleliwa. Yoowoona, ntoko mwaarow'anyu—mwaarow'anyu woona e—epwittipwitthi, eyo yaamurowa ohimya wira manri. Moone, nyuwo nave-tho muhaana okhalana otaphuleliwa waya, moone, n'urukunxa yoowoona eyo khutaphulela.

205 Vano kaahiweha nsana ohiyu, nka—nkaawerya oromola masin'ale a eFaransa, kaahaana ohimya ileetera.

206 wAfrika ni vakhiviru wa maHotentoote ale ni apakawu, n'itthu, kaahaana ohimya ileetera sa masin'aya naanaanoru, waahimeerya wira yaari aani, ohimya ileetera naanaanoru ni nntaava naya. Awo, awo yaanisuwela yaari exeeni, emalakaruru ohimmwa ileetera. Masi, moone masi Owo onnisuwela mattaava othene. Owo Muluku Ohinimala.

207 Nrowe nipacerye ohiy'ula, niireke, miloko mithanu na miili ni thanu, mpakha emiya, sa O. Ti O, ti yeeyo owo ohimmy'awe? Miyo... [Munna mmosa oniira, "Ayo. O."—Mol.] O, O. Ayo. Vaareera. T'ani orina ettikitti ya mavekelo miloko mithanu na miili ni thanu, nrowe noone? Mwa O, ettikitti ya mavekelo

O, miloko mithanu na miili ni thanu, nvenxe ntata, yoole orina. iO. Vareera. Murwe *va*. Miloko mithanu miili ni thanu, miloko mithanu na miraru, miloko mithanu na miraru ni thanu, miloko mithanu na mixexe, miloko mithanu na mixexe ni thanu, emiya, murwe epantte ela *nno* xontte. Vaareera, ti, muthataane va, voowaakuva, 'okhala wira khaninrowa okhalana okathi. Kinrowa ororomela wira munimwiira yeeyo.

208 Nkawehani ettikitti anyu ya mavekelo. Nkawehani ettikitti ya mavekelo ya mutthu mwaattamann'anyu. Exeeni...Nto akhala mutthu orakanle, aruuihwe muliinyani mwa mavekelo. Vano awo yakhalana O, ntoko paahi O, miloko mithanu na miili-...

209 Miloko mithanu na miili ni thanu mpakha emiya, muthataane wenco *nno*, xontte. Vatthu ti vatthu mury'anyu, mpithela osulu, nipuro nikina, mukhuruwe, murwe muliinyani voowaakuva sinweryaney'aya, xontte, wira nuurele okathi.

210 Vano nyuwo akina va, muhirina ettikitti ya mavekelo, munoovenxa matat'anyu mwiire, "Miyo nkirina ettikitti ya mavekelo, Munna Branham, masi kinaamini"? Nvenxe matata.

211 Vano muupuwele, kinrowa olavula ni nyuwo sa Namukuttho Muulupale. "Owo ti Namukuttho Muulupale onwerya okwanyyiwa n'iwereyelo w'otteettheya wahu." Owo ti *Yehova-Yire*, "mukuttho ovaheriwe n'Apwiya." Owo ti *Yehova-Rafa*, "Apwiya anvoniha iretta sanyu sothene." Munnaamini yeeyo? [Muthukumano oniira, "Amen."—Mol.] Owo ti *Yehova-Manase*. *Eyuuma* yo waakiha, *nikula* nowiisakihano, *murettele* ahu, Owo nlelo ti yoowo. Ahe, akavi anaamini wira masina awo othene owoopola a Yehova yaamaliheriwe mwa Yesu? ["Amen."] Vekeekhai, Owo aahaana okhala. Vakhala wi Owo—vakhala wi Owo...Vano, awo t'ohivalaanyeya, tivo Owo aahaana okhala othene awo. Nto vakhala wira Owo nlelo ti Yehova-Yire, Owo ti Yehova-Rafa. Vakhala wira Owo ti Yehova-Yire...Owo ti *Yehova-Yire*, ti "mukuttho ovaheriwe n'Apwiya wo woopola," vano Owo ti *Yehova-Rafa* ole "onvoniha iretta sahu sothene." Amen. Openywa onrwa ni Muluku paahi.

212 Vaareera, atthu ethataanaka; nkirina okathi w'owoona t'ani ni wira awo axeeni. Masi vano, othene iwo answela wira nkinoosuwelani, nvenxe ntata, mwiire, "Miyo kinnimphavela Muluku. Masi nyuwo khamunkisuwela, Munna Branham, masi kinnimphavela Muluku. Kinrowa ovenxa ntata naka paahi."

213 Vano mwamaalaru paahi minuutu vakhani, nwehe, mwiikasoope, mmaale. Vano nkinihimya wira, kaahimiyaka wira, "mmaale"...Apwiya yaira etthu, nyuwo mwatthuna waattotopela Apwiya; iwo okokhorela. Masi enihimya'aka, "weettasa, ovenya," moosuwela, iwo onkhala ohittitimiha. Munnona? Vano Eroho Yowarya ennuuliwa muru saana, wuuliwa muru saana. Munnona? Etthu ntoko yeeyo paahi, enikihiya

paahi, ni kihaana owana-tho, emaara ekina, moone. Masi mwaiwelelerau paahi!

²¹⁴ Munnimuupuwela natiri Awe oopacerya? “Mwaakhalihe athu owaaminini, ni mukhale naxariya, khiivo enrowa ovirikanya mavekelo.” Munnuupuwela yeeyo? [Muthukumano oniira, “Amen.”—Mol.] Ti yeeyo. Ni eyo e. . .Nkinatthi woona eyo evonyaka nlelo, ni khenrowa ovonya. Ti Muluku.

²¹⁵ Vano ninrowa waakuva ni eliinya ya mavekelo, wira naavirihe anci-ene sinrow’ahu owerya, wa mureerelo w’atthu. Masi nyuwo murina ittikitti sa mavekelo muhinrowa wiihaniwa ohiy’ula, musuke ettikitti anyu, ninoorowa wooruhani. Vaareera.

²¹⁶ Vano nyuwo iwo muhirina ittikitti sa mavekelo, muupuwele. Wala, nyuwo iwo, hata mukhalanaka ettikitti ya mavekelo wala nnari, mwaamini paahi wira Owo ori ntoko aHeperi kapiitulu 4 va. “Owo ti Namukuttho Muulupale onwerya okwannyiwa ni owerya wa ottettheya wahu.” Moone sinto Owo onkhala. . . Moone sinto Yehova ohiisooniherya Mwaneene eriyari y’atthu Awe, ntoko siiraly’awe mahiku a oSotoma. Vaareera.

²¹⁷ Vaareera, mulopwana. Vano nrowe nivekele, vano, mukhale oottittimiha saana. Vano muupuwele, Nuulumo nimosa ninkhuma wa Muluku ti noovikana etthu mutthu ti mutthu aakhanly’awe olavulaka. Vano, mulopwan’ola va, miyo—miyo nkimmusuwela. Ni kinoona wira owo. . . Nyuwo mwa mmalapo wa miyo, ti siiso, mulopwana? [Munn’owo oniira, “Ayo.”—Mol.] Nyuwo mwa mmalapo. Hiyo noosuwela etthu emosa, wira oowanli ahu nihaana okhala Ohoolo wa Muluku nihiku nlo; ntoko atthu nihaana okumana Weiwo. Ela emaar’ahu yoopacerya okumana.

²¹⁸ Vano nyuwo mwarwa va, sinto munoowereiwa, nkisuwenle; khino siiso ekhanleene etthu ekina, moone. Masi miyo ka—kaawiixaathenryeni matata, khwira, “Attottopeliwe Apwiya! Rowakani, mukhale mukumi.” Eyo ti yooreera. Nyuwo mwaamuwerya waamini yeeyo. Masi ankhii Awo yooleelani etthu evonyeiye ni nyuwo? Vano, moone, eyo ti yoovirikana, vano munoosuwela wira ensuwanyeiha mukhalelo Awe. Moone, owo khuwaarowa okhala mukhalelo aka. Miyo ka mutthu; nkaarowa osuwela hat’etthu ya yoowo. Kinoomalaru omuleela, “Nkinoosuwelani.” Owo khonkisuwela. Masi eyo yaarowa wira exeeni? Eyo yaamuwera osuwanyeiha mukhalelo wa Yesu Kristu mmosaru nsana, olelo, ni mahiku othene. Nisuwelaka wira nkaakhanle okhalaka miyo, nkaakhanle okhalaka miyo, ’okhala wira miyo nkimmusuwela mulopwan’owo. Kinoovenxa ntata naka; *va* ari Masu. Munnona? Miyo nkimmusuwela. Owo khonkisuwela. Masi mukhalelo wa Yesu Kristu. . .

²¹⁹ Vaakhanle wira Yesu eemenle va, n’ula, onoowereiwa, owo aahimmyeru wira, “Pwiya Yesu, mukivonihe,” exeeni

Yesu aarow'awe omuhimeerya? "Miyo kihira." Eyo ekeekhai? [Muthukumano oniira, "Amen."—Mol.]

220 "Owo onyakatteliwe sootheka sahu; makhwatta Awe t'anivoninhe." Woopoliwa wothene ophiyenry'ahu okhalana opakiwe oKalvario. Okhuma wu mpakha ohoolo, waaminii, waamini muteko omaliheriwe. Eyo ekeekhai? [Muthukumano oniira, "Amen."—Mol.] Vaareera.

221 Vano, vano vakhala wira Yesu mukumii, ni miyo koolavula Masu Awe... Eyo vo, otthikela okhweya weiwe ni waamini, naaminiki Masu Awe. Okathi Owo okumann'awe ni miyo ohiy'ule, Owo iirale, "Enimwiiraneya wira munrowa osuwelaka hata isiiri sa mmurimani mwaya. Awo yaahaaminiru ethoonyeryo ele yoopacerya ya mmatatani, ahaana waamini ila." Munnona? "Awo yaahaaminiru, weso ephome enootakhaliha elapo."

222 Siiso ntoko siiraly'aya okathi wa Moise. Khwira, "Yaahaaminiru ithoonyeryo iyo piili, vano mmwaraxele ephome vatthayani," moone, "mmwaraxele maasi vatthayani, anookhala ephome."

223 Vano wira noone paahi, kaweryaru paahi woona ole okhanle mukattyamiho anyu, eyo yaamoosivelihani ni owaaminihani, khiyaarowa? [Munna oniira, "Vekeekhai."—Mol.] Moosuwela wira waahaana okhala mukhalelo wa Mutthu onimuhimy'aka, Yesu Kristu.

224 Mulopwana, ntoko simanly'aka omuweha, onoosusa. T'okhuneeliwa eruku. Khiivo etthu murette okhanly'aya wiiraka wira emukhaliherye mulopwan'owo. Owo ori mmukhaleloni m'okhwa. Eyo ekeekhai. Owo orimooperariwa, nto operasawu waari operasawu wa mmavoro. Nto owo kankuru, vano kankuru ene noomwaramwareya mwa nyuwo othene. Yaari ekeekhai, nvenxe ntata. Muluku paahi t'onwerya onvoniha. [Munna oniira, "Aleluya! Aleluya! Aleluya!"—Mol.] Masi, nwehe, kintthuna kooleleni etthu, mulopwana. Xetwani uwo khino siiso iipintheene mwaalo wa meetiku, masi khonwerya omwiipitha Muluku. Munnaamini yeeyo? Munnaamini? ["Oh! Oh!"] Vano miyo kinvekela, wira, mwa Nsina na Yesu Kristu, wira etthu iyo emuhiye, wira mulopwan'owo akhale mukumi. Hat'etthu; orootteettheya paahi. Vaareera.

225 Nyuwo ni miyo n'amalapo mmosa ni mukhw'awe, mulopwana ni muthiyana anookumana. Vano, ntoko mulopwana, nkinoosuwelani. Ni alakela, ntoko muthiyana, nyuwo khamunkisuwela; voohikhala paahi woona nsina naka, wala elatarato, wala etthu ntoko yeeyo. Masi khaninsuwelana mmosa ni mukhw'awe. Iyo ti mikhalelo sahu. Hiyo khaninsuwela mukhalelo wa mukina. Masi mukhalelo wa Kristu, Owo ti Masu, nto Masu aalaiheriwa nihiku nla. Nyuwo mookiiwa kilavulaka. Vano mikhalelo Sawe saamurowa omusuwanyeiha Yoowo va.

Kahi miyo kimusuwanyehaka Yoowo. Miyo nkinoosuwelani. Nyuwo munniwa. Wawihu—muthukumano ahu onniwa saana yeeyo? [Muthukumano oniira, “Amen.”—Mol.] Munnona? Miyo ka—miyo ka mulopwana. Miyo ka munn’inyu paahi.

²²⁶ Ntoko muthiyana veehimyeni, ohimya etthu evonyeiye, etthu evonyeiye ni nyuwo, wala etthu entthun’anyu, wala etthu mukhalenly’anyu va. Muluku akhale mphuki a yeeyo. Nyuwo munihaawa ni mukhalelo w’esafura. Ti yeeyo, kehiyo? [Munna muthiyana oniira, “Ayo.”—Mol.]

²²⁷ Miyo—miyo kweekwe kinnikumana ni yeeyo, mutthu onuupuwela wira kirimwaanyiherya. Miyo nkinaanyiherya eyo. Nnari. Imaara kamosa-kamosa, kinnoona yeeyo, mutthu. Khamukhanle ovithaka miyuupuwelo sanyu vano. Vano aakhala oophiyaka, koosuwela, atthu anli ahinreere ohoverya akilanthé va. Munnona? Tivo vano muupuwele miyo kinwerya wiihana nsina nanyu, nave, Muluku onniwerya, tivo muhiye wuupuwele yeeyo. Mukihiye kiwooniheni.

²²⁸ Nkawehani va, muhano. Nkakiweheni miyo. Nkisuwenle etthu Owo oohimenry’aweni, masi miyo—miyo koosuwela etthu Owo okhanly’awe. Nto owo ti mukhalelo Awe osuwanyehiwe. Ayo, mukhalelo w’esafura, ephome, maasi.

²²⁹ Vano, va, va yookhala etthu. Moone vakhala wira anuupuwele wira ela ehakoo. Ookhala mwaana oninkelel’anyu, ori vaava. [Munna oniira, “Ayo.”—Mol.] Ti yeeyo. Owo orina, eri vammilo wawe, [“Ayo.”], nalokholokho, atenoite. Oolaiheriwa operasawu. Kahi ekeekhaii? [“Ayo.”] mukuxe nleeso nlo mumpweherye, ni mwaamini. [“Ayo.”] Muhihoverye. Khonrowa otthuneya operasawu. Vano mwaamini ni murima wothene.

²³⁰ Ehaali anyu? Etthu ene ti, wa muthiyan’ola va, wira yookhala enoov’anyu. Munimoova nlepa nooyariwa-no okhala kankuru. Uh-huh, uh-huh. Vano rowakani, mwaaminiki, vano khenrowa okhala siiso. Rowakani paahi, mwaaminiki ni murima wothene. Mikhalelo, kahi sawaka; Sawawe!

²³¹ Munnaamini vano? [Muthukumano oniira, “Amen.”—Mol.] Eyo ehaana owaaminiha atthu othene. [“Amen!”]

²³² Vano, nkinoosuwelani. Miyo ka mmalapo wa nyuwo. Muluku onnoosuwelani. Munnaamini wira . . . ? Nyuwo moosuwela wira nkinoosuwelani, ni moosuwela wira khamunkisuwela, vano munnaamini wira Eroho ela enlavula khekhanle okhalaka erooho aka? Okhala wira, miyo, ntoko mutthu, nkinoosuwelani. Masi mukhalelo wa Masu yaalaiheriwe ti Masu akhanle oowiithaxa onvikana xoowa oniitha ninno ninno, ni anlamula miyuupuwelo ni sintthun’aya murima.

²³³ Khamunreere owereiwa. Mwaahikhalana mukattyamiho w’athiyana, yaari erukulu, nto erukulu iyo jaarina kankuru. Vano nyuwo khurawa khuphwanya olooliwa wa enamuna emosa,

waari olooliwa wa raatiyu, nto etthu ene emosa paahi owo iraly'awe ommwarya paahi mwa nyuwo othene. Ni nyuwo munookhwa Muluku ahoovoniheni. Eyo ekeekhahi. Munnaamini vano wira Owo onimoovonihani? [Munna oniira, "Ayo."—Mol.] Muluku a Wirimu ampwapwele xetwani uwo omwiipinthe meetiku. ["Oh!"] Owo pooti omwiipintheene raatiyu, masi kahi Eroho Yowarya. Rowakani, mmwaamni Yoowo, vano, munna. Muhihoverye hata vakhani, masi mwaamini.

²³⁴ Munnaamini wira Muluku onniwerya ovoniha mukhalelo owo wa mafuwa, ni wookhalihani mukumi? [Munna oniira, "Ayo."—Mol.] Munnaamini? Vano rowakani, mutthapaka, mwiiraka, "Kooxukhuru, Pwiya. Kinnaamini wira mafuwa aka aamala."

²³⁵ Ehaali anyu? Nyuwo munoonanariwa. Nyuwo munikhalaka oonanariwa okathi munci-ene. Vo, eyo yoototha nikhwatta na murupela mmiramani mwanyu, ninookhalihani—mukattyamiho anyu wa mmirimani. Nto nyuwo munnitthuna. . . Munnitthuna olya yoly'anyu y'ohiyu? Munimwiira etthu enooleel'akani? Rowakani, mwalye, mwa Nsina n'Apwiya Yesu.

²³⁶ Munnaamini ni murima wothene? [Munna oniira, "Kinnaamini."—Mol.] Nyuwo mwa mwamuthiyana ooreera murima, enikhala ntoko mwa yoowo. Munnaamini wira miyo ka murumeyi Awe? ["Amen."] Munaamini wira mukhalelo Awe waamuwerya okhala va, wira. . . Masu, Aneene, ni natiri a nihiku nla, "Miteko sinvar'aka nyuwo munoovara nave?" ["Amen."] Nkinwerya ovoniha. Owo ohiira yeeyo; masi mukhalelo Awe onnimoovoniherya Yoowo, onniwerya wooleelani etthu evonyeeye ni nyuwo. Murina mukattyamiho w'athiyana, mukattyamiho w'othiyana. ["Ayo, mulopwana."] Munaamini wira Muluku onnivoniha naanaano va? ["Ayo. Amen."] Rowakani, khonrowa woohaaxani-tho. Mwaamini ni murima wothene.

²³⁷ Munnaamini wira miyo ka murumeyi Awe? [Munna oniira, "Ayo, mulopwana."—Mol.] Muluku akileela ole okhanle mukattyamiho anyu, munimwaamini wira owo mukhalelo wa Yesu Kristu? Eri mmuthanani mwanyu. Khekanle-tho. Rowakani, mwaamini ni murima wothene. Mwaamini.

²³⁸ Murwe, muhano. Ni nyuwo murina mukattyamiho wa mmirimani. Mwaamini ni murima wothene, vano murowe mwalye yolya anyu y'ohiyu. Muliyale. Yesu Kristu onnookhalihani mukumi.

²³⁹ Murwe. Mukattyamiho anyu ephome anyu. Murina tiyapeeti. Munnaamini wira Muluku onimookhalihani mukumi ni woovonihani yeeyo? Rowakani, mwiire, "Kooxukhuru, Pwiya Yesu," onnookhalihani mukumi. Rowakani, mwaamini ni murima wothene.

240 Murwe. Muthana anyu, munnaamini wira Muluku onoovoniha muthana ni ookhaliheni mukumi? Rowakani, mutthapeke, mwiire, “Kooxukhuru, Pwiya Yesu.”

241 Ni nyuwo mwaahikhalana mukattyamiho wa muthan’anyu. Mutthikele mweettaka paahi, mwiiraka, “Kooxukhuru, Pwiya. Miyo koovona.” Mwaamini ni murima wothene.

242 Ni nyuwo mwaarina mukattyamiho wa muthana. Munoonela sayi yeeyo? Mwaamini ni murima wothene vano, muroweke mukhale mukumi. Mwaamini wira Yesu Kristu onnookhalihani mukumi. “Mwaaminikiru, sothene sinniweryanya.” Vaareera.

243 Ankhi kahoohimenryeni hat’etthu, kaavirale paahi khumwiixaatherya matata, munnaamini wira aamukhala mukumi? Awo annoona ehilonke. Munnaamini wira aamukhala? Murwe nno. Miyo kinnimuvirikanya xetwani ula, mwa Nsina na Yesu Kristu. Owerya wa Muluku onvonihe mwaan’owo. Amen. Muhihoverye, muhihoverye hata vakhani, nto owo onookhala mukumi. Mwaamini ni murima wothene.

244 Muluku aahoovonihe, munookhalana attootto nihiku nlo, wiipa makhonyokhonyo. Masi munnaamini wira Muluku onnivoniha wiipa wanyu makhonyokhonyo? Nto murowe, mwiire, “Kooxukhuru, Pwiya. Kinoowaaminini, vano Nyuwo munookivoniha.” Vaareera.

245 Murwe naanaano va. Vekeekhai mwaha wa munnuwelo anyu. Nyuwo khamunreere onanariwa. Khamunreere onanariwa, ohiyu saana. Mwaavaraka muteko n’itthu sothene, khamunreere onanariwa. Munnaamini vano? Khenrowa-tho woohaaxani nto. Rowakani, mwiiraka, “Kooxukhuru, Pwiya Yesu.”

246 Murwe, mulopwana. Munnaamini wira Muluku onnivoniha mukattyamiho wa murima? [Munna oniira, “Ayo.”—Mol.] Onoovoniha murim’anyu? Mutthikele murowaka paahi, mwiiraka, “Kooxukhuru, Pwiya. Kinnaamini ni murima wothene.”

247 Muluku onnivoniha elapaha, ni onnikhaliha saana, nave. Munnaamini yeeyo, mulopwana, ni murima wothene? [Munna oniira, “Kinnaamini.”—Mol.] Vaareera. Rowakani mutthapaka, mwiiraka, “Kooxukhuru, Pwiya Yesu.”

248 Ankhi nyuwo vo, munnaamini? Ankhi muthukumano? Akina wa nyuwo vamuthukumanoni vano mwaamini.

249 Mulopwan’ola okilante vaava va, onwereiwa iphumu, munnaamini wira Muluku onoovoniha mukattyamiho owo wa iphumu? Vaareera, munoowerya okhalana etthu nvekenly’anhu, nto. Amen.

250 Ikuru s’ephome, mukilante ottuli wawe vo. Munnaamini wira Muluku onimoovonihani ikuru s’ephome? Ehoohiyani, mulopwana. Miyo nkimmusuwela, nkinamooneke kookhalaru.


²⁵¹ Mwiiwe, mulopwana, munnamini wira otteettheya iwo mmutikani mwanyu, ettettemeri y'otteettheya mmutikani, munnaamini wira Muluku onoovoniha? Munaamini? Nvenxe ntata mwaaminiki vale. Vaareera.

²⁵² Amwaar'inyu akilanthé vo, awo anoohaxeya mwaha wa nikusaku. Munnaamini wira ninnoohiyani, nave, munna?

²⁵³ Muhano okilanthé ottuli wahu saana vale, orina wiipiwa mitika. Munnaamini wira Muluku onoovoniha wiipiwa wanyu mitika, muhano?

²⁵⁴ Va ookhala muhano mmosa owanre ekhasako yaamukhaani, ekhasako yooxeerya, va. Owo okilanthé vo. Owo orina mukattyamiho wa nikusaku, nave. Munaamini wira Muluku onoovoniha mukattyamiho anyu wa nikusaku? Nvenxe ntata, mwaaminiki vale.

²⁵⁵ Khula mutthu mu onaamini wira mikhalelo sa Yesu Kristu siri eriyari ahu, ohiy'ula, avenxe ntata, aire, "Miyo kinnaamini." [Muthukumano onootthapa ni wira, "Miyo kinnaamini!"—Mol.]

²⁵⁶ Othene ari mu, ammukupali Owo ntoko mpenuxa anyu, nvenye mweemele, mwiire, "Miyo kinnaamini." Mweemele. Nvenye, mukhaterani mwanyu, etthu p'itthu. Yesu Kristu mmosaru nsana, olelo, ni mahiku othene. Miyo kinnoovahani, mwa Nsina n'Apwiya Muluku. 

MULUKU AISUWANYEIHAKA MWANEENE
NI MIKHALELO SAWE EMK64-0320

(God Identifying Himself By His Characteristics)

Mutthak'ola wa Munna William Marrion Branham, opaceryawene olaleeriwe ni Enkelesi Namathanu ohiyu, mahiku yeettaka 20 mweeri wa Março, 1964, Exikola Yuulupale y'oDenham Springs oDenham Springs, Louisiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org